

**BOSNA I HERCEGOVINA
FEDERACIJA BOSNE I HERCEGOVINE
Tuzlanski kanton
GRAD TUZLA
GRADSKO VIJEĆE**

S T E N O G R A M

**SA ČETRDESETE SJEDNICE GRADSKOG VIJEĆA TUZLA ODRŽANE 27.
JUNA 2024. GODINE U POSLOVNOM OBJEKTU „GRAFIČAR“ SA POČETKOM U
10,00 SATI.**

- SJEDNICI PRISUSTVUJE 31 VIJEĆNIK.

U Tuzli, juni 2024. godine

NATAŠA PERIĆ – predsjedavajući Gradskog vijeća Tuzla

Molim vijećnike da zauzmu svoja mjesta. Počinjemo uskoro sa radom.

(Intoniranje himne Bosne i Hercegovine).

Poštovani vijećnici Gradskog vijeća Tuzla, obrađivači materijala, predstavnici medija, gosti, otvaram 40. redovnu sjednicu Gradskog vijeća Tuzla.

Konstatujem da prema evidenciji Stručne službe Gradskog vijeća, sjednici prisustvuje 29 od ukupnog broja vijećnika, što je dovoljno za punovažan rad i odlučivanje. Za današnju sjednicu svoje kašnjenje su najavile vijećnice Merima Softić Sprečić i Esana Kavazbašić Huskanović.

Podsjećam vijećnike da su uz materijale za današnju sjednicu dobili i zapisnik, a svaki vijećnika i stenogram sa 39. redovne sjednice Gradskog vijeća Tuzla, održane 30.05.2024.

Da li ima primjedbi na zapisnik sa prethodne sjednice?

Ako nema, stavljam na izjašnjavanje zapisnik sa 39. redovne sjednice.

Molim vijećnike da se izjasne.

Glasanje je okončano.

Konstatujem da je zapisnik sa 39. redovne sjednice Gradskog vijeća Tuzla, održane 30.05.2024., usvojen sa,

22 glasa za, nije bilo protiv i nije bilo suzdržanih.

Obavještavam vijećnike da je gradonačelnik Grada Tuzle, kao predlagač, dana 24.06.2024. godine, dostavio obavijest da sa dnevnog reda 40. redovne sjednice Gradskog vijeća Tuzla povlači tačku 3. RAZMATRANJE I USVAJANJE ODLUKE O IZMJENI ODLUKE O KOMUNALNIM DJELATNOSTIMA.

Obavijest gradonačelnika Grada Tuzle o povlačenju u kojoj su navedeni razlozi povlačenja dobili ste putem e-maila i u materijalu podijeljenom neposredno pred početak sjednice.

Obavještavam vijećnike da je Centralna izborna komisija Bosne i Hercegovine dana 26.06.2024., Gradskom vijeću Tuzla dostavila Odluku, broj 06-1-07-1-580/24, o prestanku mandata i dodjeli mandata sljedećem kvalificiranom kandidatu, kojom se Nusretu Muminoviću vijećniku u Gradskom vijeću Tuzla, izabranom na Lokalnim izborima 2020., sa liste političkog subjekta SDA – Stranka demokratske akcije, utvrđuje prestanak mandata sa danom 31.05.2024., a upražnjeni mandat se dodjeljuje Nevresu Huriću, sljedećem kvalificiranom kandidatu sa liste političkog subjekta SDA – Stranke demokratske akcije.

U skladu sa članom 41. Poslovnika Gradskog vijeća Tuzla, kojim je propisano da Mandatno-imunitetska komisija razmatra izvještaj nadležne izborne komisije o naknadno dodijeljenim mandatima i o tome podnosi izvještaj Gradskom vijeću, Mandatno-imunitetska komisija je razmatrala Odluku Centralne izborne komisije Bosne i Hercegovine o prestanku mandata i dodjeli mandata sljedećem kvalificiranom kandidatu, te podnijela Izvještaj Gradskom vijeću Tuzla.

S tim u vezi, Kolegij Gradskog vijeća je danas pred početak 40. sjednice Gradskog vijeća Tuzla održao vanrednu sjednicu, te predlaže Gradskom vijeću Tuzla da se u dnevni red 40. redovne sjednice Gradskog vijeća Tuzla uvrsti tačka pod nazivom RAZMATRANJE IZVJEŠTAJA MANDATNO-IMUNITETSKE KOMISIJE O ODLUCI CENTRALNE IZBORNE KOMISIJE BOSNE I HERCEGOVINE O PRESTANKU MANDATA I DODJELI MANDATA SLJEDEĆEM KVALIFIKOVANOM KANDIDATU SA LISTE SDA – STRANKE DEMOKRATSKE AKCIJE (ODLUKA BROJ: 06-1-07-1-580/24 OD 06.06.2024.).

Navedena tačka bi se razmatrala u okviru I svečanog dijela 40. redovne sjednice Gradskog vijeća, a ostale tačke u okviru II radnog dijela.

Stavljam na izjašnjavanje navedeni prijedlog Kolegija Gradskog vijeća i molim vijećnike da se izjasne.

Glasanje je okončano.

Konstatujem da je Izvještaj Mandatno-imunitetske komisije o odluci Centralne izborne komisije/Središnjeg izbornog povjerenstva Bosne i Hercegovine usvojen sa, 26 glasova za, nije bilo protiv i nije...(OMAR AHMIĆ - Ovo je prijedlog da se uvrsti u dnevni red. Poslije će glasat). A, ovo je prijedlog. Aha. (OMAR AHMIĆ - Znači, prihvata se prijedlog Kolegija).

Konstatujem da je prijedlog Kolegija Gradskog vijeća da se u okviru I-og svečanog dijela 40. redovne sjednice Gradskog vijeća uvrsti tačka pod nazivom RAZMATRANJE IZVJEŠTAJA MANDATNO-IMUNITETSKE KOMISIJE O ODLUCI CIK/SIK BiH O PRESTANKU MANDATA I DODJELI MANDATA SLJEDEĆEM KVALIFIKOVANOM KANDIDATU SA LISTE SDA – STRANKE DEMOKRATSKE AKCIJE (ODLUKA BROJ: 06-1-07-1-580/24 OD 06.06.2024.) usvojena sa,

26 glasova za, nije bilo protiv i nije bilo suzdržanih.

Sada stavljam na izjašnjavanje predloženi dnevni red za današnju sjednicu.

Molim vijećnike da se izjasne.

Glasanje je okončano.

Konstatujem da je dnevni red u cjelini usvojen sa,

26 glasova za, nije bilo protiv i nije bilo suzdržanih.

D N E V N I R E D

I DIO – SVEČANI

1. RAZMATRANJE IZVJEŠTAJA MANDATNO-IMUNITETSKE KOMISIJE O ODLUCI CIK/SIP BIH O PRESTANKU MANDATA I DODJELI MANDATA SLJEDEĆEM KVALIFIKOVANOM KANDIDATU SA LISTE SDA – STRANKE DEMOKRATSKE AKCIJE (ODLUKA BROJ: 06-1-07-1-580/24 OD 06.06.2024. GODINE)

II DIO – RADNI

- Usvajanje Skraćene verzije zapisnika sa 39. redovne sjednice Gradskog vijeća Tuzla, održane 30.5.2024. godine

1. VIJEĆNIČKA PITANJA I INICIJATIVE

2. RAZMATRANJE I USVAJANJE ODLUKE O DODJELI JAVNIH PRIZNANJA U 2024. GODINI

3. RAZMATRANJE I USVAJANJE

a) ODLUKE O RASPISIVANJU JAVNOG OGLASA ZA IZBOR I IMENOVANJE ČLANOVA UPRAVNIH ODBORA U JAVNIM USTANOVAMA, ČIJI JE OSNIVAČ GRAD TUZLA (SA TEKSTOM JAVNOG OGLASA)

b) ODLUKE O UTVRĐIVANJU POSEBNIH USLOVA I KRITERIJA ZA IZBOR I IMENOVANJE ČLANOVA UPRAVNIH ODBORA U JAVNIM USTANOVAMA, ČIJI JE OSNIVAČ GRAD TUZLA

c) RJEŠENJA O IMENOVANJU KOMISIJE ZA IZBOR ČLANOVA UPRAVNIH ODBORA U JAVNIM USTANOVAMA, ČIJI JE OSNIVAČ GRAD TUZLA

4. RAZMATRANJE I USVAJANJE ODLUKE O DODJELI U ZAKUP STANOVA U VLASNIŠTVU GRADA TUZLE I STANOVA NA KOJIMA GRAD TUZLA IMA PRAVO RASPOLAGANJA

5. RAZMATRANJE I USVAJANJE PRAVILNIKA O IZMJENAMA PRAVILNIKA O KRITERIJIMA I POSTUPKU ZA OSTVARIVANJE PRAVA NA SOCIJALNE JEDNOKRATNE NOVČANE POMOĆI IZ BUDŽETA GRADA TUZLE

6. RAZMATRANJE I USVAJANJE NACRTA PLANA UPRAVLJANJA OTPADOM GRADA TUZLE 2024-2028

7. RAZMATRANJE I USVAJANJE IZVJEŠTAJA O RADU I POSLOVANJU JAVNIH I DRUGIH PREDUZEĆA, ČIJI JE OSNIVAČ ILI SUOSNIVAČ GRAD TUZLA ZA 2023. GODINU

- a) JP RTV 7 d.o.o. Tuzla
- b) JP „Pannonica“ d.o.o. Tuzla
- c) JKP Saobraćaj i komunikacije Tuzla

8. RAZMATRANJE I USVAJANJE IZVJEŠTAJA O RADU JAVNIH USTANOVA ČIJI JE OSNIVAČ ILI SUOSNIVAČ GRAD TUZLA ZA 2023. GODINU

- a) JU Centar za socijalni rad Tuzla

9. RAZMATRANJE IZVJEŠTAJA KOMISIJE ZA IZBOR I IMENOVANJA

10. TEKUĆA PITANJA

a) Obavještenje „Tržnice-Pijace“ d.o.o. Tuzla o razlozima prolongiranja izrade Izvještaja o radu i poslovanju za 2023. godinu

b) Obavještenje JP BIT Centar d.o.o. Tuzla o razlozima prolongiranja izrade Izvještaja o radu i poslovanju za 2023. godinu

c) Obavještenje JKP „Komunalac“ d.o.o. Tuzla o razlozima prolongiranja izrade Izvještaja o radu i poslovanju za 2023. godinu

Prelazimo, dakle, na:

I DIO - SVEČANI:

RAZMATRANJE IZVJEŠTAJA MANDATNO-IMUNITETSKE KOMISIJE O ODLUCI CIK/SIP BiH O PRESTANKU MANDATA I DODJELI MANDATA SLIJEDEĆEM KVALIFIKOVANOM KANDIDATU SA LISTE SDA – STRANKE DEMOKRATSKE AKCIJE (ODLUKA BROJ: 06-1-07-1-580/24 OD 06.06.2024.).

Centralna izborna komisija Bosne i Hercegovine je dana 06.06.2024., donijela Odluku, broj 06-1-07-1-580/24, o prestanku mandata i dodjeli mandata sljedećem kvalificiranom kandidatu, kojom se Nusretu Muminoviću vijećniku u Gradskom vijeću Tuzla, izabranom na Lokalnim izborima 2020. godine sa liste političkog subjekta SDA – Stranka demokratske akcije, utvrđuje prestanak mandata sa danom 31.05.2024., a upražnjeni mandat se dodjeljuje Nevresu Huriću, sljedećem kvalificiranom kandidatu sa liste političkog subjekta SDA – Stranke demokratske akcije. Nakon što je navedena odluka Centralne izborne komisije Bosne i Hercegovine, postala pravomoćna dana 17.06.2024. Nevresu Huriću, vijećniku sa liste političkog subjekta SDA – Stranke demokratske akcije, dodijeljen je mandat vijećnika u Gradskom vijeću Tuzla.

U skladu sa članom 41. Poslovnika Gradskog vijeća Tuzla, kojim je propisano da Mandatno-imunitetska komisija razmatra izvještaj nadležne izborne komisije o naknadno dodijeljenim mandatima i o tome podnosi izvještaj Gradskom vijeću, obavještavam vijećnike da je Mandatno-imunitetska komisija razmatrala Odluku Centralne izborne komisije Bosne i

Hercegovine o prestanku mandata i dodjeli mandata sljedećem kvalificiranom kandidatu, te podnijela Izvještaj Gradskom vijeću Tuzla.

Pozivam predstavnika Mandatno-imunitetske komisije da pročita Izvještaj. Izvolite. Kolega Zoran Jovanović ispred Komisije.

**ZORAN JOVANOVIĆ – predstavnik Mandatsko-imunitetske komisije
- samostalni vijećnik**

Zahvaljujem predsjedavajuća. Pošto je predsjednik odsutan, na godišnjem odmoru, evo ja ga mijenjam po ovlaštenju. Pozdravljam sve kolegice i kolege, ostale prisutne i evo na osnovu člana 30. i 41. Poslovnika Gradskog vijeća Tuzla, drugi prečišćeni tekst, Mandatsko-imunitetska komisija sa 43. redovne sjednice održane dana 26.06.2024. godine, Gradskom vijeću podnosi sljedeći izvještaj:

Mandatsko-imunitetska komisija je razmatrala Odluku o prestanku mandata i dodjeli mandata sljedećeg kvalificiranog kandidata, broj 06-1-07-1-580/24 od 06.06.2024. godine, te je jednoglasno usvojila sljedeći zaključak.

Mandatsko-imunitetska komisija konstatuje da je Centralna izborna komisija Bosne i Hercegovine, Odlukom o prestanku mandata i dodjeli mandata sljedećem kvalificiranom kandidatu, broj 06-1-07-1-580/24 od 06.06.2024. godine, utvrdila prestanak mandata sa danom 31.05.2024. godine, Muminović Nusretu, vijećniku u Gradskom vijeću Tuzla, izabranom na lokalnim izborima 2020. godine, sa liste političkog subjekta SDA – Stranka demokratske akcije, a da je na osnovu Odluke Centralne izborne komisije BiH o dodjeli mandata sljedećem kvalificiranom kandidatu, broj 06-1-07-1-580/24 od 06.06.2024. godine, upražnjeni mandat vijećnika u Gradskom vijeću Tuzla dodijeljen Hurić Nevresu, sljedećem kvalificiranom kandidatu, sa liste političkog subjekta SDA – Stranka demokratske akcije. Čestitam kolegi.

NATAŠA PERIĆ

Hvala kolegi Jovanoviću.

Pozdravljam gradonačelnika, gospodina Lugavića, koji nam se pridružio.

Sada stavljam na izjašnjanje **IZVJEŠTAJ MANDATNO-IMUNITETSKE KOMISIJE O ODLUCI CIK/SIP BiH O DODJELI MANDATA VIJEĆNIKU SA LISTE POLITIČKOG SUBJEKTA SDA – STRANKE DEMOKRATSKE AKCIJE** i molim vijećnike da se izjasne.

Glasanje je okončano.

Konstatujem da je **IZVJEŠTAJ MANDATNO-IMUNITETSKE KOMISIJE O ODLUCI CIK/SIP BiH O DODJELI MANDATA VIJEĆNIKU SA LISTE POLITIČKOG SUBJEKTA SDA – STRANKE DEMOKRATSKE AKCIJE** usvojen sa,

26 glasova za, nije bilo protiv i nije bilo suzdržanih.

Pozivam sada kolegu Nevresa Hurića, da u skladu sa članom 10. Poslovnika Gradskog vijeća Tuzla („Službeni glasnik Grada Tuzle“- drugi prečišćeni tekst, broj 5/22) da svečanu izjavu. Ovdje ispred mene. A ostale, molim da ustanu.

SVEČANA IZJAVA

„Svečano izjavljujem da ću povjerenu dužnost vijećnika obavljati savjesno, pridržavati se Ustava Bosne i Hercegovine, Ustava Federacije Bosne i Hercegovine, Ustava Tuzlanskog kantona, zakona i Statuta Grada Tuzla i zalagati se za ljudska prava i slobode i da ću u svim prilikama štiti interese države Bosne i Hercegovine, Federacije

Bosne i Hercegovine, Tuzlanskog kantona i Grada Tuzla i ravnopravnost naroda i građana”.

U svoje lično ime i u ime vijećnika Gradskog vijeća, upućujem vam srdačne čestitke i želim sve najbolje.

(Aplauz).

II DIO – RADNI

Prelazimo na prvu tačku dnevnog reda:

VIJEĆNIČKA PITANJA I INICIJATIVE

Evo, samo da nam Nevres oslobodi pitanja. Nevres je krenuo...

Idemo VIJEĆNIČKA PITANJA

Vijećnica Ana Pejić i vijećnik Anel Ibeljić (ANA PEJIĆ – Prilažemo sve). Prilažete sve. Dobro. Vijećničko pitanje, vijećnik Elvir Bijedić. Izvolite.

ELVIR BIJEDIĆ – vijećnik Socijaldemokratske partije

Zahvaljujem predsjedavajuća. Pozdravljam sve prisutne. Ja imam jedno vijećničko pitanje upućeno prema Vladi Tuzlanskog kantona.

Naime, kada će biti završeni radovi na objektu Muzičke škole u Tuzli i ukoliko su pri kraju molim za odgovor kada bi konačno objekat mogao biti u funkciji?

Dakle, obrazloženje: Napominjem da je kamen temeljac za spomenuti objekat udaren još u septembru 21-e godine. Dinamikom radova je predviđeno da bude u funkciji za školsku 22/23-u godinu. Nakon što je došlo do smjene Vlade koja je započela projekat, radovi su u potpunosti stali.

Kako čelnici i nastavno osoblje osnovne i srednje škole, Muzičke, još uvijek čekaju useljenje u svoju zgradu, postavljam pitanje kada bi ono moglo biti i realizovano?

Naglašavam da je Vlada TK u mandatu prethodnog premijera Kadrije Hodžića u 21-oj godini za izgradnju objekta izdvojila sredstva u visini od milion i po Konvertibilnih maraka. Učešće u projektu su podržali UNDP sa sto hiljada. I ono što nas kao Vijeće naročito zanima jeste da je to da je Grad Tuzla, dakle, učestvovao u visini sedamdeset hiljada Konvertibilnih maraka. Hvala.

NATAŠA PERIĆ

U redu. Hvala. Vijećnik Omer Berbić, pa ćete dostavit, pošto niste ovdje dostavili.

OMER BERBIĆ – vijećnik Naše stranke

Ja ću dva pitanja ovako. Tri ću dostaviti vamo.

Prvo pitanje: Po kojem osnovu Mejdan može iznajmljivati parking, odnosno staviti rampu i baviti se rentanjem parkinga? To je isključiva nadležnost Saobraćaja i komunikacija. Ljudi koji tamo žive, koji su u obrazloženju, znači, ljudi koji tamo žive, koji su tu godinama parkirali, sada moraju plaćati kartu koja je puno veća od povlaštene stanarske karte koja je po, po, po...po cijenama Saobraćaja i komunikacija. I zanima me da li Mejdan kao javna ustanova

ima to u svom Statutu da se bavi iznajmijavanjem, konkretno parkinga? Ukoliko nema, onda mislim da bi trebalo tu nadležnost prebaciti na Saobraćaj i komunikacije ili ljudima koji tamo žive, napraviti mogućnost da plaćaju povlaštenu stanarsku kartu po cijenama koje to rade Saobraćaj i komunikacije, jer izuzetno je neprofesionalno i nije nikako u redu da ljudi jedne mjesne zajednice moraju plaćati kartu koja je 10, 20, 30 puta veća u odnosu na ljude iz drugih mjesnih zajednica, a govorimo o istom gradu, istoj opštini. Samo dva različita preduzeća. Jedno koje najvjerojatnije nema mogućnost da se bavi ovim poslom, a drugom koje ima.

Drugo pitanje se odnosi konkretno na Ši Selo. Kada će doći do realizacije odnosno završavanja radova na ulici kod kružnog toka?

Naime, prije petnaestak dana ta ulica je izrovana. Ona je nasuta nekim kamenom. Ali, kako trenutno stvari stoje, puno ljudi će da tuži Grad Tuzlu, Grad Tuzlu, iz razloga što će im otpast bankine. Imaće problema sa amortizerima, s obzirom da su tu rupe i po 10, 15, 20 centi. Tako da, ovo je i pitanje, ali i urgencija. Da se ovo pitanje podhitno sanira, podhitno riješi. To je najveća mjesna zajednica, odnosno, među tri najveće mjesne zajednice u Tuzli, a izrovano je puta sigurno dužine nekih 70 do 100 metara. Hvala lijepo. A, još jedno ću priložiti.

NATAŠA PERIĆ

U redu. Hvala. Aha. Dobro. Da li još neko ima pitanja? Dobro.

Prelazimo na VIJEĆNIČKE INICIJATIVE

Vijećnica Ana Pejić i vijećnik Anel Ibeljić (ANA PEJIĆ – Prilažemo). Prilažete. Dobro. Vijećnik Elvir Bijedić. Izvolite.

ELVIR BIJEDIĆ

Hvala. Prilažem.

NATAŠA PERIĆ

Prilažete. Ima li još neko da nije dostavio, a hoće da pročita, pa da dostavi? Nema. Dobro.

Prelazimo na drugu tačku dnevnog reda: Razmatranje i usvajanje odluke o dodjeli javnih priznanja u 2024. godini. Predlagač je Komisija za odlikovanja i priznanja. Obradivač: Stručna služba Gradskog vijeća. (vijećnik Selma Čatibušić govori bez uključenog mikrofona op.a.).

A nisam vidjela. Izvini. Hajd. (vijećnik Selma Čatibušić govori bez uključenog mikrofona op.a.). Pa hajd može. Izvini. Nisam vidjela. Ja sam gledala u tebe, al vidim ti...Izvini. Nisam vidjela. (OMER BERBIĆ – I ja ću priložiti tri inicijative). Dobro. Omer će priložiti tri inicijative.

SELMA ČATIBUŠIĆ – vijećnik Platforme za progres

Također. Obzirom da sam dobila danas tek odgovor na ovu jednu vijećničku inicijativu od strane Javnog komunalnog preduzeća Saobraćaj i komunikacije, u skladu sa mojom inicijativom za omogućavanje besplatnog parkinga za dobrovoljne davaoce krvi koji su krv darovali više od dvadeset puta, dobila sam odgovor da je u skladu sa tim potrebno izmijeniti

Odluku o javnim parkiralištima, odnosno da se, je li, Saobraćaj i komunikacije svoju djelatnost obavlja u skladu sa Odlukom o javnim parkiralištima na području grada Tuzle.

Ovom prilikom prilažem inicijativu, a predložit ću i prijedlog za izmjenu i dopunu Odluke o javnim parkiralištima u smislu da se odluka izmijeni, da osobe koje su više od dvadeset puta darovale krv imaju mogućnost na besplatan parking. A inicijativu prilažem, je li, samom Gradskom vijeću koje je nadležno za izmjene i dopune ove Odluke.

Druga vijećnička inicijativa odnosi se na uređenje, odnosno pravilnu sječu drveća u području Ši Sela oko ogedala koje reguliše saobraćaj. Prije par dana sam tu vozila i vidjela sam da je ogedalo totalno nekako, nekako je skroz prekriveno samim drvećem, tako da je potrebno to izrezat da bi se uopšte saobraćaj mogao tu regulisat, da bi ljudi mogli pravilno da imaju, je li, uvid na cestu. Hvala.

NATAŠA PERIĆ

Hvala Selma. Jelde Omere vi ste rekli tri? (OMER BERBIĆ – Tri). Dobro. U redu.

Prelazimo na drugu tačku:

RAZMATRANJE I USVAJANJE ODLUKE O DODJELI JAVNIH PRIZNANJA U 2024. GODINI

Predlagač: Komisija za odlikovanja i priznanja

Obrađivač: Stručna služba Gradskog vijeća

Materijal su razmatrali: Komisija za statutarna pitanja i propise i klubovi vijećnika

Da li ima potrebe za uvodnim izlaganjem? (ZIJA H RIFATBEGOVIĆ – Ima, ima). Molim? (ZIJA H RIFATBEGOVIĆ – Mogu li, ja ću zatražit). Možete.

Molim predsjednika Komisije za odlikovanja, gospodina Redžepa Ismailovskog da da kratko uvodno izlaganje. Izvolite.

REDŽEP ISMAJLOVSKI – predsjednik Komisije za odlikovanja

Hvala. Dobar dan. Pozdravljam sve prisutne. U najkraćem mogu vas informisati da smo mi zaključak koji smo dobili sa zadnje sjednice Gradskog vijeća zakazali sjednicu, razmotrili taj zaključak, veoma odgovorno ponovo preispitali sve sadržaje podnešenih inicijativa, sve biografije, dodatno se informisali o pojedinim pitanjima i pošto nam to dozvoljava i nalaže Odluka o priznanjima i odlikovanjima i mi smo na osnovu duže diskusije donijeli isti zaključak da nemamo nikakve promjene u predloženoj odluci i predlažemo odluku koju smo prvobitno dostavili, da se kao takva usvoji. Hvala vam.

NATAŠA PERIĆ

Hvala.

Ima li potrebe da se pročita izvještaj komisije? Al evo kolega je već obrazložio.

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Vijećnik Berbić. Izvolite.

OMER BERBIĆ

Hvala ljepo. Ja nisam mislio ulaziti u ovo, jer inače dodjela...Odluka o dodjeli javnih priznanja treba da bude svečana odluka. Al mislim da ide se u nekom pravcu koji nije dobar po grad Tuzlu, odnosno po ovo Gradsko vijeće. Iz dva razloga.

Prvo, zato što ovim priznanjima počeli smo da dodjeljujemo priznanja ljudima koji su predsjednici određenih organizacija, al isto tako ljudima koji su direktori određenih organizacija na nivou grada Tuzle. Sada da me se loše ne shvati. Ja obje osobe lično jako cijenim i poštujem njihov rad. Ali iz jednog principa zbog kojeg ja smatram da se ljudima koji vode političke stranke, ljudima koji vode javne institucije i evo Turističku zajednicu koja možda nije javna institucija u tom smislu, al je sigurno jako vezana za Grad Tuzla i mi ovim putem puno podržavamo turističku organizaciju. Mislim da nije korektno da se mi kao Gradsko vijeće miješamo u dodjelu priznanja ljudima koji su na čelima, na čelu političke organizacije ili ljudima koji su na čelu jedne od javnih institucija, moram tako da kažem. Bolje da smo dali konkretno organizacijama zbog kojih su oni nominovani, nego da dajemo direktno ljudima, jer to se otvara Pandorina kutija.

Iduće pitanje, oćemol mi početi da dajemo svojim direktorima javnih preduzeća? Svojim direktorima javnih ustanova? Svojim šefovima službi u Gradu Tuzla, koji su jako puno uradili naravno za Grad Tuzla? Znači, postavlja se pitanje možemol mi sad imenovati ministre aktuelne, po kojekakvim vladama za ono što su uradili, premijere? Ima tu puno ljudi koji su uradili puno stvari za Tuzlu. Al, mislim da je apsurd da mi sad kao Gradsko vijeće raspravljamo. Ove stvari treba držati svečanim i treba držati jedan određen dignitet.

Iz tog razloga ću ja ovdje tražiti pojedinačno izjašnjavanje i ne mogu da glasam protiv osoba, jer ih jako cijenim, jako poštujem. Objekti osobe i njihov rad i sve ono što su uradili. Ali isto tako ne mogu da podržim. I ja ću kada se bude glasalo o ove dvije osobe izaći iz sale. Ne mogu glasati protiv, ne mogu glasati za. Al isto tako ne mogu prekršiti princip zbog kojeg evo sad sam objasnio zbog kojeg smatram da stvarno ne bi trebali da ulazimo u ovakve vrste, u ovakve vrste stvari, u ovakve vrste kompromisa. Hvala ljepo.

NATAŠA PERIĆ

Hvala vam Omere.

Zaključujem raspravu vijećnika.

Pošto ste zatražili pojedinačno glasanje, molim Omara da sad po prijedlozima, ovaj, čita. Počnite. Molim vas malo tišine.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

Znači, prvi prijedlog Komisija za odlikovanja i priznanja predlaže Gradskom vijeću Tuzla da se priznanje Povelja Grada Tuzle u povodu obilježavanja 9. maja dodijeli Enveru Mandžiću.

NATAŠA PERIĆ

Dobro. Molim vijećnike da se izjasne.

Glasanje je okončano.

Konstatujem da je pročitani prijedlog dobio potrebnu većinu sa, 18 glasova za, niko nije bio protiv i 1 suzdržan.

Molim sljedeći prijedlog.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

Komisija za odlikovanja i priznanja predlaže Gradskom vijeću da se priznanje Počasni građanin Tuzle u povodu obilježavanja 1. marta dodijeli Nenadu Čanku.

NATAŠA PERIĆ

Molim vijećnike da se izjasne o pročitanoj prijedlogu.
Glasanje je okončano.
Konstatujem da je pročitani prijedlog dobio potrebnu većinu, 18 vijećnika je bilo za, nije bilo protiv i 1 suzdržan.

Molim sljedeći prijedlog.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

Komisija za odlikovanja i priznanja predlaže Gradskom vijeću da se priznanje Tuzlanska plaketa u povodu obilježavanja 4. aprila dodijeli Ahmetu Bajriću.

NATAŠA PERIĆ

Molim vijećnike da se izjasne.
Glasanje je okončano.
Konstatujem da je pročitani prijedlog usvojen sa, 18 glasova za, nije bilo protiv i 1 suzdržan.

Molim sljedeći prijedlog.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

Komisija za odlikovanja i priznanja predlaže Gradskom vijeću da se priznanje Tuzlanska plaketa u povodu obilježavanja 4. aprila dodijeli Amri Jaganjac.

NATAŠA PERIĆ

Molim vijećnike da se izjasne o pročitanoj prijedlogu.
Glasanje je okončano.
Konstatujem da pročitani prijedlog je dobio potrebnu većinu, 16 vijećnika je glasalo za, niko nije bilo protiv i 1 suzdržan.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

Komisija za odlikovanja i priznanja predlaže Gradskom vijeću Tuzla da se priznanje Tuzlanska plaketa u povodu obilježavanja 4. aprila dodijeli Demiru Gašiju.

NATAŠA PERIĆ

Molim vijećnike da se izjasne o pročitanoj prijedlogu.
 Glasanje je okončano.
 Konstatujem da je pročitani prijedlog usvojen sa
 18 glasova za, nije bilo protiv i 1 sudržan.

Molim sljedeći prijedlog.

**OMAR AHMIĆ – Stručni savjetnik za normativno-pravne poslove i
 opsluživanje komisija Gradskog vijeća Tuzla**

Komisija za odlikovanja i priznanja predlaže Gradskom vijeću Tuzla da se priznanje
 Tuzlanska plaketa u povodu obilježavanja 4. aprila dodijeli Feridu Musliću.

NATAŠA PERIĆ

Molim vijećnike da se izjasne.
 Glasanje je okončano.
 Konstatujem da pročitani prijedlog nije dobio potrebnu većinu
 5 vijećnika je glasalo za, niko nije bio protiv i 13 sudržanih.

**OMAR AHMIĆ – Stručni savjetnik za normativno-pravne poslove i
 opsluživanje komisija Gradskog vijeća Tuzla**

I posljednji prijedlog.

Komisija za odlikovanja i priznanja predlaže Gradskom vijeću Tuzla da se priznanje
 Tuzlanska lenta u povodu obilježavanja 15. maja dodijeli Mirzi Mustafagiću.

NATAŠA PERIĆ

Molim vijećnike da se izjasne.
 Glasanje je okončano.
 Konstatujem da je pročitani prijedlog usvojen sa
 18 glasova za, nije bilo protiv i 1 sudržan.

Nemamo više.

Prelazimo na treću tačku dnevnog reda:

RAZMATRANJE I USVAJANJE:

**a) ODLUKE O RASPISIVANJU JAVNOG OGLASA ZA IZBOR I
 IMENOVANJE ČLANOVA UPRAVNIH ODBORA U JAVNIM USTANOVAMA, ČIJI
 JE OSNIVAČ GRAD TUZLA (SA TEKSTOM JAVNOG OGLASA)**

**b) ODLUKE O UTVRĐIVANJU POSEBNIH USLOVA I KRITERIJA ZA
 IZBOR I IMENOVANJE ČLANOVA UPRAVNIH ODBORA U JAVNIM
 USTANOVAMA, ČIJI JE OSNIVAČ GRAD TUZLA**

**c) RJEŠENJA O IMENOVANJU KOMISIJE ZA IZBOR ČLANOVA
 UPRAVNIH ODBORA U JAVNIM USTANOVAMA, ČIJI JE OSNIVAČ GRAD
 TUZLA**

Predlagač: gradonačelnik Grada Tuzla

Obrađivač: Služba za ekonomski razvoj, poduzetništvo i poljoprivredu

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanja (pod c) i klubovi vijećnika.

Ima li potrebe za uvodnim izlagajem?

Da li ima potrebe da se pročitaju izvještaji komisija?

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika.

I sada stavljam...Hoćemo sve u paketu glasat? (Može). Dobro.

Znači, glasamo o dvije odluke pročitane i o rješenju.

Molim vijećnike da se izjasne.

De molim vas ko je u sali da glasa.

Glasanje je okončano.

Konstatujem da su pročitane odluke i rješenje usvojeni sa,

21 glas za, 1 je bio protiv i nije bilo suzdržanih.

Prelazimo na tačku četiri:

RAZMATRANJE I USVAJANJE ODLUKE O DODJELI U ZAKUP STANOVA U VLASNIŠTVU GRADA TUZLE I STANOVA NA KOJIMA GRAD TUZLA IMA PRAVO RASPOLAGANJA

Predlagač: gradonačelnik Grada Tuzla

Obrađivač: Služba za boračko-invalidsku zaštitu, stambene poslove i integraciju raseljenih lica

Materijal su razmatrali: Komisija za statutarna pitanja i propise, Komisija za ekonomske odnose, Komisija za stambena pitanja i klubovi vijećnika

Ima li potrebe za uvodnim izlaganjem?

Ima li potrebe da se pročitaju izvještaji komisija?

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika i stavljam na izjašnjavaње ODLUKU O DODJELI U ZAKUP STANOVA U VLASNIŠTVU GRADA TUZLE I STANOVA NA KOJIMA GRAD TUZLA IMA PRAVO RASPOLAGANJA.

Glasanje je okončano.

Konstatujem da je ODLUKA O DODJELI U ZAKUP STANOVA U VLASNIŠTVU GRADA TUZLE I STANOVA NA KOJIMA GRAD TUZLA IMA PRAVO RASPOLAGANJA usvjena sa,

21 glas za, nije bilo protiv, nije bilo suzdržanih.

Tačka pet:

RAZMATRANJE I USVAJANJE PRAVILNIKA O IZMJENAMA PRAVILNIKA O KRITERIJIMA I POSTUPKU ZA OSTVARIVANJE PRAVA NA SOCIJALNE JEDNOKRATNE NOVČANE POMOĆI IZ BUDŽETA GRADA TUZLE

Predlagač: gradonačelnik Grada Tuzla

Obrađivač: Služba za kulturu, sport, mlade i socijalnu zaštitu

Materijal su razmatrali: Komisija za statutarna pitanja i propise, Komisija za ekonomske odnose i klubovi vijećnika

Ima li potrebe za uvodnim izlaganjem?

Ima li potrebe da se pročitaju izvještaji komisija?

Otvaram raspravu klubova vijećnika.

Zatvaram...Molim? (NEVRES HURIĆ – Imam ja). Imate vi. Izvolite. Izvolite Nevrese.

NEVRES HURIĆ – vijećnik Stranke demokratske akcije

Zahvaljujem predsjedavajuća. Ja sam sinoć malo gledao materijal u vezi socijalne jednokratne novčane pomoći za plaćanje dijela troškova liječenja obavljenog u inostranstvu. Stranica broj 7. član 18. Licima koja se privremeno nađu u stanju socijalne potrebe usljed oboljenja koja se po preporuci i mišljenju konzilija nadležne zdravstvene ustanove ne mogu liječiti u Bosni i Hercegovini, može se dodijeliti socijalna jednokratna novčana pomoć iz budžeta Grada Tuzle za plaćanje dijela troškova liječenja obavljenog u inostranstvu. Tačka.

E sad, moj je prijedlog il sugestija da se ovdje doda još ukoliko nisu finansirani iz sredstava obaveznog zdravstvenog osiguranja ili donatorskih sredstava, Pomozi.ba ili neka slična radi sticanja neosnovanog bogaćenja.

Naime, mi smo svjedoci bili prethodnih par godina da su mnogi na osnovu nelegalnih sredstava obogatili se, ovaj, ne znam sam da zaštitimo Gradsko vijeće i sam Grad Tuzla u vezi toga. Nisam bio u prethodnim mandatima, pa tako...To je moj prijedlog.

I član 19. Ovo nisam našo. Tu mi treba isto malo pojašnjenje. Član 19. Pravo na socijalnu jednokratnu novčanu pomoć za plaćanje dijela troškova liječenja obavljenog u inostranstvu mogu ostvariti lica koja imaju stalno prebivalište na području grada Tuzle i ispunjavaju uslove iz člana 18. stav. 1. ovog Pravilnika.

Ono što je moje pitanje jeste lice koje imaju stalno prebivalište. Ima li kakav rok ukoliko lice treba da ima prebivalište u gradu Tuzla? Naime, u ostalim gradovima na području kantona ne dijeli se ova socijalna pomoć kategorijama, tako da postoji mogućnost eventualno da ljudi sa Srebrenika promijene CIPS i da apliciraju za sredstva za liječenje u inostranstvu na području grada Tuzle.

Osim toga, tamo u dodjeljivanju stanova piše da trajanje ovog stalnog prebivališta, odnosno, CIPS-a je minimalno tri godine, tako da je moj prijedlog da se u član 19. stavi znači, stalno prebivalište na području grada Tuzle u minimalnoj dužini od tri godine.

NATAŠA PERIĆ

Evo ovako kolega Huriću. Vi, ne može prijedlog zaključka zato što na ovo idu amandmani, a amandmani se moraju po poslovniku ispoštovati. Jedino što vam se može preporučiti da eto uputite neku inicijativu na julskoj sjednici za izmjenu ovog Pravilnika. Eto. Al ne može ovako na ovaj način. Sad ne može. (NEVRES HURIĆ – Sad samo ovako). Sad ste rekli. Al eto, ostalo je u stenogramu. . (NEVRES HURIĆ – Hajd dobro).

Zaključujem raspravu klubova vijećnika.

Otvaram raspravu vijećnika.

Zatvaram raspravu vijećnika.

Stavljam na izjašnjavaje PRAVILNIK O IZMJENAMA PRAVILNIKA O KRITERIJIMA I POSTUPKU ZA OSTVARIVANJE PRAVA NA SOCIJALNE JEDNOKRATNE NOVČANE POMOĆI IZ BUDŽETA GRADA TUZLE.

Molim vijećnike da se izjasne. Molim vas malo tišine.

Glasanje je okončano.

Konstatujem da je PRAVILNIK O IZMJENAMA PRAVILNIKA O KRITERIJIMA I POSTUPKU ZA OSTVARIVANJE PRAVA NA SOCIJALNE JEDNOKRATNE NOVČANE POMOĆI IZ BUDŽETA GRADA TUZLE usvojen sa,
21 glas za, nije bilo protiv i nije bilo suzdržanih.

Tačka šest:

RAZMATRANJE I USVAJANJE NACRTA PLANA UPRAVLJANJA OTPADOM GRADA TUZLE 2024-2028

Predlagач je...Molim vas malo pažnje. Bez priče.

Predlagач je: Radna grupa za izradu i praćenje realizacije Plana upravljanja otpadom Grada Tuzle 2024-2028

Obrađivač: Služba za komunalne poslove, izgradnju i poslove mjesnih zajednica

Materijal su razmatrali: Komisija za komunalne poslove i pitanja mjesnih zajednica, Komisija za prostorno uređenje i zaštitu okoline i klubovi vijećnika

Evo ovako. S nama je gospođa Džemila Agić, ispred Centra za ekologiju. Ona je izrazila želju da nam ukratko predstavi ovaj plan, pa nek to ujedno bude i uvodno, et neko izlaganje da vidite, ovaj, pa eto... Izvolite Džemila. Možete vi ovdje.

DŽEMILA AGIĆ - Direktorica Centra za ekologiju i energiju

Dobar dan svima. Meni je izuzetna čast i zadovoljstvo da danas mogu prezentirati Plan upravljanja otpada. Potrudit ću se da to bude brzo, da možemo brzo krenuti na diskusiju.

Što se tiče Plana upravljanja otpada, on je rađen od strane radne grupe, koja je imenovana od gradonačelnika i vidite da se nalaze predstavnici Službe za komunalne poslove, izgradnju o poslove mjesne zajednice, Službe za prostorno uređenje i zaštitu okoliša, Službe za budžet i finansije, Zavoda za urbanizam, Služba za inspekciju je uključena, Služba civilne zaštite, zatim savjetnik gradonačelnika, predstavnici Javnog komunalnog preduzeća Komunalac i Centar za ekologiju i energiju.

Plan je rađen i završen je. Što se tiče, znači, cilja ovog plana jeste u stvari da da pregled količina, analizu trenutnog stanja, način upravljanja, da osmisli mjere za narednih pet godina koji će dovesti do unapređenja upravljanja otpada u gradu Tuzla.

Plan će trajati od 2024. do 28-e godine. Usaglašen je sa planskim dokumentima na nivou Federacije, Tuzlanskog kantona, al istovremeno je usaglašen i sa većinom evropskih... evropske legislative iz ove oblasti. Na početku da kažem samo da je u stvari nešto o količinama otpada kod nas u Tuzli. Vidite ovde od 2018. do 23-e godine kakve se količine, al evo za 23-u imamo oko 43.000 tona otpada. Ono čime se naša radna grupa vodila, vodili smo se tim ciljem da upravljanje otpada zadržimo u svojim rukama, tj. u nadležnosti ili u rukama Grada Tuzle. Zato smo predlagali određene mjere, jer jedna od alternativa je u stvari da svoj otpad deponiramo na neku od regionalnih deponija koje su sanitarne, iako bismo ove naše 43.000 tona otpada odvezli na jedno od sanitarnih deponija. To bi nas skupo koštalo, jer po toni košta oko 50 Konvertibilnih maraka deponiranje. Zato smo cijeli plan usmjerili u tom smjeru da pokušamo da to bude u...kod nas na našoj teritoriji i da i dalje to odlažemo na našu doponiju.

Znači, Grad Tuzla je 2017. donio Plan upravljanja otpada i 2017. smo krenuli sa uvođenjem primarne selekcije otpada. Znači, promijenili smo način upravljanja otpada. Promijenili smo standardizirali smo kante za individualno stanovanje i u okviru ovog perioda prvog smo, znači, za 5.000 domaćinstava uveli primarnu selekciju otpada nabavkom standardiziranih kanti, sivih za miješani otpad i žutih za ambalažni otpad. Sive 120, žute 240.

I na taj način se to širilo u individualnom stanovanju. Znači, obuhvatili smo sad zasad samo 5.000 domaćinstava. U tom pravcu ćemo nastaviti da idemo. Ali vidim ovde, znači, da standardizacijom kanti i uvođenjem odgovornijeg odnosa, mijenja se izgled naših naselja.

Što se tiče kolektivnog stanovanja, ispred kolektivnih stambenih objekata, na 59 lokacija su postavljeni ovakvi tipski objekti. Oni služe za odvajanje ambalažnog otpada i pored se nalaze kontejneri za staklo. Što se tiče ambalažnog otpada, on odlično ide. Što se tiče stakla, tu zna biti miješanja. Ali recimo ovo su te 59 lokacija ispred kolektivnih stambenih objekata.

Za nove objekte koji se tek planiraju ili grade, za njih je obaveza da oni sami sebi nabave ovakve, ovakvu infrastrukturu u koju će odlagati otpad.

Pored ovih, na lokacijama gdje nije bilo moguće postaviti tipske objekte ili iz prostornih ili iz ekonomskih razloga, postavljali su se ovi žuti kontejneri i primijećeno je da su počeli građani i njih da prihvataju.

Pored toga na sedam lokacija smo napravili nadstrešnice da bismo estetski uljepšali centralni dio grada i one su urađene u ovom periodu. Znači, nakon prikupljanja iz individualnog stanovanja, žute kante se prazne dva puta mjesečno, a sive kante jedno mjese...jednom sedmično. Ono što nakon tog prikupljanja, a po gradskom dijelu, znači, ispred kolektivnih stambenih objekata, zavisi od dinamike punjenja. Nekad je to dvaput sedmično, nekad jednom sedmično. Nekad zavisi od dinamike.

Znači, vidite ovako izgleda taj ambalažni otpad. Pomiješano je sve ono što se može iskoristiti. Ide na traku. Na traci se vrši selekcija sekundarnih sirovina. Sekundarne sirovine ovako izgledaju kada se razvrstaju, zatim se baliraju i idu u prodaju. I evo ovdje je prikazano 2014. do 23-e godine, kolike količine sekundarnih sirovina su izdvojene i otišle su u proces reciklaže.

Što se tiče kabastog otpada uveli smo odvojeno sakupljanje. Direktno svako ko plaća redovno odvoz otpada može na deponiju 365 dana ili radnim danima odvesti svoj kabasti otpad i odložiti ga bez nadoknade. Međutim, indirektno u prigradskim naseljima se odvaja znači četiri puta godišnje i to januar, april, juli i oktobar i to prva sedmica u mjesecu, a u gradskim se postavljaju u ovakve peke i to samo nije posljednja, nego jedno je prva, drugo je posljednja da bi imali ljudi iz Komunalca vremena da to odvezu.

Što se tiče elektronskog i elektroničkog otpada, to radimo u saradnji sa ovlaštenom firmom ZEOS, koja je operater. Oni su na 21 lokaciju postavili kontejnere za ambalažni otpa...za elektronski i elektronički otpad i dodatno uz kabasti otpad, građani mogu odložiti svoj elektronski i elektronički otpad da bi bio odvežen.

Pored toga, 2019. je napravljena kompostana, jedna mala platforma, na koju se ostavlja, odlaze organski otpad koji se sitni i miješa i od njega se proizvodi kompost ili humus.

Za individualno stanovanje smo predvidjeli da se dijele, u stvari da ljudi rade kompostiranje organskog otpada. Međutim, mi smo kroz različite projekte koje smo realizirali tri preko granična zajedno sa Javnim komunalnim preduzećem Gradom Tuzle Centar za ekologiju i energiju posetepeno nabavljamo kompostere, dijelimo i doniramo građanima i po tom programu je 600 domaćinstava obuhvaćeno, mada je veliki broj domaćinstava individualnog stanovanja ima vlastite kompostere i kompostira na jednostavnije načine.

Radili smo promociju, edukaciju građana, edukaciju uposlenika, komunikaciju sa građanima i tako dalje. Sve ovo što smo radili, planiramo da nastavimo da radimo. Znači, pokazalo se da je primarna selekcija otpada na izvoru jedno od rješenja, tako da smo u ovom narednom planskom periodu planiranja da nastavimo i to nastaviti će se samo kontrolisati, obnavljati tipski objekti. Zatim će se svake godine uključivati novih 2.000 domaćinstava u individualnom stanovanju. Cilj nam je da u narednom periodu planskom 10.000 novih domaćinstava uključimo. To sve zavisi koliko budemo mogli izdvojiti sredstava iz budžeta, koliko Komunalac i koliko nađemo donatorskih sredstava. Ali smo isto tako planirali ako dođemo do dodatnih sredstava, da ćemo ovo ubrzati i omasoviti.

Što se tiče decentralnog kompostiranja, tu smo planirali 250 kompostera na godišnjem nivou da ide. Međutim, ono što smo planirali svakako da unaprijedimo zbrinjavanje otpada na regionalnoj deponiji. I tu je planirano prikupljanje dokumentacije i dobijanje dozvole za eventualno proširenje naše deponije za odlaganje otpada, jer je ono sada zapunjena pa preko 95%. Što se tiče, da bismo preventivno, jer to nije rješenje kolika god deponija jest, ona će se zatrpati. Planirali smo raditi, već smo aplicirali kod Fonda za okoliš. Analizu morfološkog sastava, morfologije otpada, za četiri godišnja doba da imamo konkretne sastavne informacije otpada. Zatim će se raditi studija da se vidi na koji način ćemo upravljati otpadom, dal ćemo ga spaljivati, proizvoditi RDF i tako dalje i nakon toga će se vidjeti u kom pravcu da se dugoročno ide u gradu Tuzla.

Ono što smo još dodatno planirali svakako da krenemo u, ne u prvom dijelu, nego u drugom dijelu ovog, implementacijom ovog dokumenta sa odvajanjem odvojenim prikupljanjem pepela i njegovim zbrinjavanjem, odvojenim sakupljanjem građevinskog otpada, ali razvrstavanje na komponente i tako dalje, sa ciljem da što manje otpada dođe na deponiju, a da što više otpada iskoristimo ili za prekrivku ili za uređenje određenih područja ili za reciklažu.

Što se tiče, danas je planirana da se poboljša još komunika...da se nastavi dobra komunikacija sa građanima, al da se ona još malo unaprijedi od strane Komunalnog preduzeća prema građanstvu, da oni budu informisani kada se šta događa. Koje su novine? Kako da oni rade upravljanje otpada u budućnosti?

Ukratko toliko, ali vi ste u dokumentu imali sve detaljno. Što se mene tiče za uvod je to to.

NATAŠA PERIĆ

Dobro. Hvala gospođi Agić na uvodnom izlaganju.

Ima li potrebe da se pročitaju izvještaji komisija? Dobro.

Otvaram raspravu klubova vijećnika i odmah da vas napomenem, obzirom da se radi o nacrtu, znači, nema zaključaka, već sve, ako budete imali neke prijedloge, oni su dio javne rasprave, uzeće se iz stenograma i svi koji budu trebali da razmatraju prijedloge će razmotriti te prijedloge.

Otvaram raspravu klubova vijećnika.

Zatvaram raspravu klu...Ah. Selma. Izvolite Selma Čatibušić, ispred kluba Platforme za progres. Izvoli.

SELMA ČATIBUŠIĆ

Ma, ja sam zapravo imala jedno pitanje, pošto sam ja često i na nekim diskusijama, predavanjima u vezi ovih stvari, poznajem i gospođu. Mene zanima, zadnji put kad smo, ovaj, radili neki projekat vezano i za crtanje onog murala koji je ekološki prihvatljiv i slično i tako bila je diskusija vezano uopšte za, onaj, selektovanje otpada, pa me interesuje da li se napravio neki pomak među građanima? Znam da nije bilo dovoljno iskreno razvijena svijest o, ovaj, selekciji otpada. Da li se uopšte primjenjuju kontejneri za te stvari? Da li, jer ja eto konkretno ispred svoje zgrade vidim da nažalost i u žute kontejnere se baca svašta i sve to nekako ide na, na, na...vidim da svakako radnici to sami rade, al mislim da bi puno lakše bilo kad bi to građani više praktikovali. Smatram da u ovom dijelu konkretno može naša gradska medijska kuća, jel, RTV 7 malo da poradi još više na promociji razvrstavanja otpada, da malo više širimo svijest o tome da kontejneri ukoliko su nabavljeni pa služe za plastiku, staklo i slično, da se u te svrhe i koriste. Eto, to je to. Hvala.

NATAŠA PERIĆ

Dobro. Hvala. Džemila, vi ćete na kraju odgovorit. Nije problem. Samo da vidimo hoćel još bit pitanja.

Zatvaram raspravu klubova vijećnika.

Otvaram raspravu vijećniku.

Vijećnik Berbić. Izvolite.

OMER BERBIĆ

Neću ja ništa dugo. Samo ću kratko reć da mi je drago da imamo osobu ili jednu organizaciju koja je ovako stručna i ovako kompetentna za rad sa otpadom, sa održivim razvojem i potpuna podrška sve što, mislim mi kao Vijeće možemo pomoć, da trebamo da pomognemo u bilo koju vrstu finansijskih i svakih drugih osnova i evo nadam se da ćemo uskoro i kada se otvore evropski projekti, sada bi trebalo malo više dobiti radi kandidatskog statusa, pa onda i kako budemo otvarali poglavlje, da ćemo što više novca povlačiti i da će ova nova Agencija Trag koja bude, da će se staviti ovo i na neki način na raspolaganje za ovakve projekte. Hvala ljepo.

NATAŠA PERIĆ

Hvala kolegi Berbiću. Ima li još neko? Aha. Ima kolega Senad Mehmedinović. Izvolite.

SENAD MEHMEDINOVIĆ – vijećnik Pokreta demokratske akcije

Hvala ljepo. Poštovana predsjedavajuća, vijećnici, predstavnici službi, u sali, van sale, sve vas srdačno pozdravljam.

Ja se nisam planirao javljat po ovoj taći dnevnog reda, al se javljam prije svega iz poštovanja prema gospođi Džemili i iz poštovanja prema nevladinoj organizaciji koja ona predstavlja Centar za ekologiju i energiju i da se zahvalim za sve ono što radi na nivou grada Tuzle, pa evo i kao ovaj Plan upravljanja otpadom grada Tuzle.

Mislim, ja sam i za neke prijašnje izvještaje, planove, komentarisao stvarno da bi oni trebali da budu čak i u nekoj formi knjige da to dođe putem savjeta mjesnih zajednica do građanstva, da se vidi šta se radi, jer ovo može da bude urnek takođe u budućnosti kako bi trebali da se prave planovi bilo koji, al evo ovdje imamo Plan upravljanja otpadom. Dakle, tehnički. Stilski. Sadržajno. Različita poglavlja koja obuhvataju ovu tematiku je stvarno za svaku pohvalu i javio sam se samo da čestitam, dakle, gospođi Džemili, da čestitam svim službama koje su se uključile da urade ovako jedan reprezentativan jak Plan upravljanja otpadom, tako da svaka pohvala u svakom slučaju.

NATAŠA PERIĆ

Hvala kolegi Mehmedinoviću.

Dal se još neko javlja od vijećnika?

Ako ne, zaključujem raspravu vijećnika.

Zamolit ću gospođu Agić samo da odgovori vijećnici Selmi Čatibušić na pitanja. Izvolite.

DŽEMILA AGIĆ - Direktorica Centra za ekologiju i energiju

Hvala vam svima na tako pozitivnoj reakciji. Ovaj plan i jest jedan od pozitivnih primjera, ovaj naš prvi koji je bio 2017. do 22-e i on je preuzet kao nekakav dobar model i već je 6 općina po uzoru na njih napravilo takav plan.

Što se tiče primarne selekcije kakvo je stanje u gradu? Pa bolje je nego što mi mislimo. Zašto recimo? Oni tipski objekti ispred zgrada, ako ništa, ljudi neće staviti...rijetko stavljaju miješani otpad. Da će oni staviti, recimo, kesu od čipsa, jer je ona suha, oni misle da se može reciklirati, ne može. Al to nije nama problem. Ali neće ubaciti lubenicu u onaj tipski objekat. To se ne događa. Znači, međutim, šta je problem? Moglo bi biti više. Mogli bi ljudi više odvajati mnogi možda i od vas koji živite u užoj gradskoj jezgri ne odnesete svaki put taamo u taj žuti kontejner. Ljudi se žale da im je daleko i ako trebaju da pređu 50 metara. To nam je problem. Znači, moglo bi biti više.

U individualnom stanovanju je to još bolje, jer tamo je individualna odgovornost, a ispred zgrade, vi malo zažmirite, bacite, niko nije vidio i vi ste čista obraza, odoste dalje. A bogami u mojoj kanti kad dođe onaj iz Komunalca, tačno zna šta je u sivoj, a šta je u žutoj. Znači, mora se raditi na edukaciji i zato smo mi i napravili jedan cijeli specifični cilj koji je vezan za edukaciju, komunikaciju i meni se sviđa otvorenost Gradske uprave sada preko društvenih mreža, tako moramo otvoriti još Komunalac da bolje komunicira s građanima, da imaju sve informacije i da ih probamo i educirati. Planirali smo poboljšati inspeksijski nadzor, jer ljudi ilegalno odvajaju, odlažu i ono što ne treba, ali ne u ove za selektivno nego u kontejnere za miješani otpad. Na primjer, sve firme koje renoviraju, kuće, građevinski otpad ilegalno odlažu i tako dalje, al to smo planirali da radimo sa inspekcijom. I divlje deponije. I tako dalje.

NATAŠA PERIĆ

Hvala vam Džemila na odgovoru. Na detaljnom odgovoru. Dobro. Ništa.

Stavljam na izjašnjavanje NACRT PLANA UPRAVLJANJA OTPADOM GRADA TUZLE 2024-2028. De mi samo recite koliko je javna rasprava? (OMAR AHMIĆ – 30 dana). 30 dana javna rasprava. Dobro.

Molim vijećnike da se izjasne o Nacrtu.

Glasanje je okončano.

Konstatujem da je NACRT PLANA UPRAVLJANJA OTPADOM GRADA TUZLE 2024-2028 usvojen sa,

22 glasa za, nije bilo protiv i nije bilo suzdržanih.

Molim Omara Ahmića da pročita zaključak.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Nacrt plana upravljanja otpadom grada Tuzle za period 2024-2028. se upućuje u javnu raspravu koja će trajati trideset dana.

- Za provođenje javne rasprave zadužuje se Služba za komunalne poslove, izgradnju i poslove mjesnih zajednica, Služba za prostorno uređenje i zaštitu okoline i Komisija za komunalne poslove i pitanja mjesnih zajednica.

Mislim da ovaj treći zaključak da se stenogram dostavlja, nema potrebe, jer nismo imali neke prijedloge.

NATAŠAPERIĆ

Nismo imali prijedloge. Nije bilo ra...Dobro. Ništa.
 Evo predlažem da se izjasnimo o oba zaključka.
 Molim vijećnike da se izjasne.
 Glasanje je okončano.
 Konstatujem da su pročitani zaključci usvojeni sa,
 22 glasa za, nije bilo protiv i nije bilo suzdržanih.

Dajem pauzu od 15 minuta. (Pauza).

**ELVIR BIJEDIĆ - zamjenik predsjedavajućeg Gradskog vijeća Tuzla,
 -vijećnik Socijaldemokratske partije**

Pozivam vijećnice i vijećnike da uđu u salu. Molim vas.

Pozivam vijećnice i vijećnike da uđu u salu, kako bi nastavili rad. Hvala.

Prelazimo na sedmu tačku dnevnog reda:

**RAZMATRANJE I USVAJANJE IZVJEŠTAJA O RADU I POSLOVANJU
 JAVNIH I DRUGIH PREDUZEĆA, ČIJI JE OSNIVAČ ILI SUOSNIVAČ GRAD
 TUZLA ZA 2023. GODINU**

- a) JP RTV 7 d.o.o. Tuzla
- b) JP „Pannonica“ d.o.o. Tuzla
- c) JKP Saobraćaj i komunikacije Tuzla

Predlagač: skupština preduzeća

Obrađivač: menadžment preduzeća

Materijal su razmatrali: Komisija za ekonomske odnose, Komisija za poduzetništvo, Komisija za mlade, obrazovanje i sport (pod b), Komisija za komunalne poslove i pitanja mjesnih zajednica (pod c) i klubovi vijećnika

Da li ima potrebe za uvodnim izlaganjem? (Nema).

Da li ima potrebe da se pročitaju izvještaji komisija? (Nema).

Otvaram raspravu klubova vijećnika.

Poslovnička. Mensur Alić. Izvolite.

MENSUR ALIĆ – vijećnik Tuzlanske alternative

Ja ću predložiti ponovo, ovaj, da se primjene i da... (ELVIR BIJEDIĆ – Molim vas samo mikrofonski. Hvala.). Ja ću ovaj predložiti ponovo da direktori uprave javnih preduzeća dostave sve odgovore na pitanja koja budu postavljena ovde, da pismenim putem, ovaj, obavijeste i svima pošalju odgovore, tako da danas ne izlaze i da daju odgovore na postavljena pitanja. Molim vas da se stavi na glasanje.

**ELVIR BIJEDIĆ - zamjenik predsjedavajućeg Gradskog vijeća Tuzla,
 -vijećnik Socijaldemokratske partije**

Jasno. Zahvaljujem vijećniku Aliću.

Stavljam na glasanje pomenuti zaključak. Ako treba da se pročita.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od direktora javnih preduzeća čiji su izvještaji o radu i poslovanju razmatrani na 40. redovnoj sjednici Gradskog vijeća da, najkasnije do augustovske, jer ipak julska je, mislim neće bit ni stenogram gotov, da do augustovske sjednice Gradskog vijeća, dostave pisane odgovore na pitanja postavljena tokom rasprave kao i na date prijedloge, sugestije i primjedbe. Zadužuje se Stručna služba Gradskog vijeća da izvode iz stenograma sa 40. redovne sjednice Gradskog vijeća, u dijelu rasprave o izvještajima o radu i poslovanju javnih preduzeća, dostavi direktorima preduzeća radi pripreme pisanih odgovora na postavljena pitanja.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Zahvaljujem. Kao što vidim već smo se izjasnili.
Predloženi zaključak je dobio potrebnu većinu,
sa 20 glasova za i 1 suzdržan, nije bilo protiv. Hvala.

Otvaram raspravu klubova vijećnika.
Vijećnik Anel Ibeljić ispred Kluba SDP-a.

ANEL IBELJIĆ – vijećnik Socijaldemokratske partije

Hvala Elvire. Dobar dan svima. Sve vas srdačno pozdravljam. Prije svega želim evo da, da čestitam i da pohvalim direktore ova tri javna preduzeća i evo iz izvještaja možemo vidjeti da su sva tri preduzeća izuzetno uspješno poslovala. Svakako, sve riječi pohvale imamo za menadžment ovih preduzeća i evo želim sreću u budućem radu.

Ispred Kluba SDP-a ja ću samo kratko osvrnuti na izvještaj preduzeća Saobraćaj i komunikacije, a druge kolege će nešto više reći o izvještajima RTV 7 i Pannonic.

Iz izvještaja koji smo dobili od strane Javnog komunalnog preduzeća Saobraćaj i komunikacije evo proizilazi da su tokom prošle godine prihodi znatno veći u odnosu na 22-u, za čak 38% gdje iznosi negdje oko 3.816.000. Rashodi su bili manji, tako da je preduzeće poslovalo sa nekom dobiti od 230.000, u evo ove posljednje dvije godine, otprilike kako je direktor gospodin Nedžad Malikić. Svi smo imali riječi hvale i mislim da ne treba pretjerano dužiti o tome. Direktor koji je uvijek dostupan svakom od vijećnika. Uradi sve ono što se može uraditi što je moguće u najkraćem mogućem roku i evo želim da dalje uspješno, ovaj, nastavi da vodi ovo preduzeće.

Ono što želim istaći evo i skrenuti pažnju ne samo direktoru, menadžmentu, ali cijelom preduzeću preduzeću jeste jedna stvar. Još u prošlom mandatu sam došao do određenih inicijativa drugih vijećnika, mislim da je to pitanje prvo pokrenuo gospodin Elvir Kasumović, vijećnik iz prošlog saziva, al takođe bilo je nekoliko inicijativa još u prošlom mandatu od strane Kluba SDP-a, pa čak i u ovom mandatu, ovaj, tokom 2021., mislim u septembru smo Klub SDP-a je podnio inicijativu da se izmijeni odluka o javnim parkiralištima u dijelu koji se odnosi na blokadu vozila. Evo, mislim, da je stvarno došlo, ovaj, krajnje vrijeme da se i taj dio odluke izmijeni. Svakodnevna...sedmično sigurno dobijem jedno do dvije primjedbe u tom dijelu gdje se građani žale da su im vozila blokirana i da moraju čekati po deset, petnaest i više minuta, naravno, zbog samog obima posla onih koji obavljaju, ovaj, tu djelatnost. U nekim situacijama

građanima se svakako, ovaj, i žuri. Imaju neke hitne postupke, hitne stvari koje moraju završiti i to predstavlja na neki način otežavajuću okolnost za naše građane.

U inicijativi koju sam ispred Kluba SDP-a dostavio, ovaj, predložena je na koji način se može izvršiti izmjena Odluke o javnim parkiralištima i predložit ću zaključak da se, ovaj, obaveže Javno komunalno preduzeće Saobraćaj i komunikacije Tuzla do sjednice Gradskog vijeća u augustu, zajedno sa nadležnom službom, pripremi izmjenu i dopunu Odluke o javnim parkiralištima u dijelu koji se odnosi na blokiranje vozila, na način da se takva vrsta blokade izbriše, odnosno, da se ukine postavljanje, evo nazvat ćemo to klasično „kandži“ na vozila.

Takođe, evo kroz cijeli ovaj mandat, al vjerujem i kolege u prethodnim mandatima tražile su, ovaj, povećanje broja parking mjesta. Svakako evo direktor je u protekle dvije godine napravio nekoliko novih parkinga i time je stvarno, ovaj, znatno povećan broj parking mjesta. Prije svega u samom centru grada izgradnjom novog parkinga. Imamo najave da će se tokom, odnosno, krajem ove godine graditi i parking garaža kod UKC-a, što je takođe bio jedan od prijedloga Kluba SDP-a. Tokom mog mandata ispred Kluba SDP-a tražio sam da se takve parking garaže naprave na drugim mjestima u gradu, kao što je Slatina, kod Doma zdravlja. Tražili smo to u Cipelićima. Mislim, čak i na Sjenjaku, al na svim drugim lokacijama gdje je stvarno potrebno, ovaj, povećati znatno broj parking mjesta.

I evo, ponovo ću sugerisati menadžmentu, odnosno predložit ću jedan zaključak da Javno komunalno preduzeće Saobraćaj i komunikacije nastavi dalje, ovaj, sa aktivnostima koji se odnose na izgradnju novih parking garaža, odnosno na stvaranje novih parkinga, bez obzira dal to bilo u vidu parking garaža ili, ili na neki drugi način, kao što je to i do sada rađeno. Eto toliko. Hvala.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolega Ibeljiću. Sljedeći se za riječ javio ispred Kluba vijećnika Tuzlanska alternativa, vijećnik Admir Hasnbašić. Izvolite.

ADMIR HASANBAŠIĆ – vijećnik Tuzlanske alternative

Hvala kolega Bijediću. Evo danas imamo izvještaje tri naša javna preduzeća i zaista je malo vremena deset minuta da se sve to elaborira u onom segmentu kako sam planirao, pa ću malo skratiti.

Naime, što se tiče Javnog preduzeća RTV 7, treba reći da ono prije svega zavisi od sredstava iz Budžeta Grada Tuzla. I to je sasvim jasno. Međutim, uspjeli su da posluju pozitivno i nadam se da će u narednom periodu napraviti još jedan veći iskorak, da će ostvariti više sredstava kroz razne projekte i kroz razne donacije i iskoristio bih priliku da čestitam novoimenovanom direktoru Damiru Ćilimkoviću, kao direktoru RTV 7 i poznavajući ga lično, siguran sam da će on uspjeti da napravi jednu dobru situaciju u narednom periodu kad je u pitanju rad RTV 7. I zahvalio bi se nekadašnjoj direktorici Jasni Kapetanović na svesrdnom pomaganju i njenom doprinosu u razvoju ovog našeg medija.

Što se tiče Javnog preduzeća Pannonica, treba reći jasno, glasno, njihovo poslovanje zavisi od broja sunčanih dana. Znači, ukoliko ima veliki broj sunčanih dana, ovo javno preduzeće će pozitivno poslovati. Ukoliko nema, situacija će biti znatno slabija. Međutim, menadžment se i u ovom preduzeću trudi i pokušava na razne načine da namakne dodatna sredstva da bi poslovanje bilo što bolje.

I na kraju, Javno komunalno preduzeće Saobraćaj i komunikacije Tuzla, kao što je rekao kolega Ibeljić, pozitivno poslovanje 38%. Veći prihodi u odnosu na 2022. godinu. Naime, povećali su se prihodi gotovo u svim segmentima. Step en iskorištenja parkirališta

povećan je za 12,5%, SMS porukama naplata povećana, pretplatničke karte povećane. Turistički vozić je takođe u znatno većem kapacitetu angažovan i zaista sve, sve pohvale za menadžment i svakako uposlenike bez kojih ne bi ovo moglo da funkcioniše. Urađeno je jako mnogo projekata u 2023. godini. Prije svega, evo izgrađeno je i ovo parkiralište kod Muzičke škole gdje su obezbijeđeni dodatnih 200 parking mjesta. Zatim, nabavljeno je vozilo „Pauk“ koje je opravdalo svoje postojanje. Nećemo govoriti o prihodima, ali opravdalo svoje, ovaj, svoju nabavku samom činjenicom da se već i svijest građana mijenja i poboljšana je saobraćajna kultura građana i sada se vodi računa zaista gdje će se parkirati. Zatim, nabavljeno je dosta mašina, odnosno stručne opreme, što je u znatnoj mjeri povećalo sigurnost uposlenika, zatim olakšalo obavljanje poslova i svakako ti poslovi su još, još kvalitetniji. Javna garaža svakako UKC Tuzla i ovdje zaista veliki angažman direktora. Znam kroz sve šta je prošao, koje je on inicijative podnosio u saradnji i sa Gradskom upravom i sa Univerzitetsko kliničkim centrom. I evo, došli smo do korak, korak na do realizacije ovog projekta koji je bitan, ne samo za Tuzlu, Tuzlanski kanton, nego i za državu Bosnu i Hercegovinu.

I na kraju želim, želim ovdje da dam demant na neke stvari koje se pojavljuju na društvenim mrežama, neke neistine. U stvari, ja bi rekao, to je prije svega neznanje pojedinaca. Spominju se na društvenim mrežama stvari da Grad da je izdvojio milion i trista hiljada Konvertibilnih maraka za rasvjetu kada je u pitanju Saobraćaj i komunikacije. Jeste izdvojio, ali rećiću vam ja na koji je način i to je zaista tako. Kompletnu opremu nabavlja, znači, za održavanje nabavlja Javno komunalno preduzeće Saobraćaj i komunikacije od svojih sredstava, obavlja javne tendere, skladišti tu opremu, ali vjerovali ili ne, cijena koju su, po kojoj su kupili tu opremu fakturiše se Gradu Tuzla po istoj cijeni. Znači, ni jedan fening nema zarade, tako da ne bi bilo zablude da zarađuje Javno komunalno preduzeće Saobraćaj i komunikacije novim sredstvima. Ali, šta je ovdje bitno? Ovo je prelomna godina. Ovo je preporod kada je u pitanju rasvjeta. Znači, imamo ugrađenih 2600 LED lampi, što će u velikoj mjeri uštediti. Već je pokazalo da je došlo do velike uštede električne energije i samim tim ta sredstva se polako usmjeravaju u novu LED, u novu LED rasvjetu. I kažem još jednom, ova činjenica i ovo da se ovaj iznos od milion i tristo faktički daje, hajd da kažemo, na neki način SIK-u, apsolutno nije tačna, nego je upravo ono što sam rekao, a ovu informaciju sam svakako dobio od direktora, jer direktor Javnog komunalnog preduzeća Saobraćaj i komunikacije ostaje, vjerujte, 24 sata na raspolaganju i svim vijećnicima i svim građanima. I zaista ko god ga je nazvao i kad god i vi vidite neku informaciju koja vam je sumnjiva i koje je negativna i upućena prema Saobraćaj i komunikacije, možete otići do njega i dobićete, dobićete potvrdu.

I ono što je još jako bitno da se drži i do brenda samog, same firme. Vidjeli smo da su uposlenici opremljeni ono, baš i kad se pojave na ulici, zaista to izgleda oprema kao da su FBI ili nešto, nešto slično. Znači, to govori o ozbiljnosti firme. Zaista je to jako bitno za razliku od ranijih dana kad se pojave ljudi u odjeći u kojoj dolaze na posao. Znači, to su sve segmenti koji su jako bitni i kažem još jednom zahvaljujući prije svega direktoru Nedžadu Malikiću, zatim korektnoj komunikaciji i radu sa svim uposlenicima koji zaista, zaista nesebično rade na svim segmentima.

I na kraju svakako Klub vijećnika Tuzlanske alternative će dati podršku za izvještaje sva tri naša javna preduzeća. Hvala.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolegi Hasanbašiću. (HASIB HIRKIĆ - Ispravka krivog navoda).
Ispravka krivog navoda. Vijećnik Hasib Hirkić. Izvolite.

HASIB HIRKIĆ – samostalni vijećnik

Pozdravljam sve prisutne. Samo kolegu Hasanbašića da ispravim. Znači, ono što dolazi sa društvenih mreža, znamo od koga dolazi i da je to početak predizborne kampanje. Hvala.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Hvala. Sljedeća za riječ se javila...Ne izvinjavam se. Sljedeći za riječ se javio Jusić Nedžad, vijećnik ispred Kluba nacionalnih manjina. Izvolite. Neka se pripremi Selma Čatibušić, ispred Kluba Platforma za progres.

NEDŽAD JUSIĆ – nezavisni vijećnik iz reda nacionalnih manjina

Hvala. Želim da pozdravim sve kolege i kolegice, kao i sve druge prisutne u sali i evo kao što su kolege malo prije rekli, ja ne znam više, u stvari šta bi rekao poslije Anela i Admira koji su stvarno detaljno sve to rekli za sva tri ova naša, (ELVIR BIJEDIĆ – Molim za malo tišine) naša javna preduzeća, prvenstveno Javno preduzeće Radio televizija 7, Javno preduzeće Pannonica d.o.o. Tuzla, kao i Javno komunalno preduzeće Saobraćaj i komunikacije Tuzla.

Ja takođe nemam nikakve kritike što se tiče ovih javnih preduzeća, nego baš pohvale što se tiče i komunikacije i saradnje kako sa, prvenstveno ću se dotaći Javnog preduzeća Radio televizije 7. Stvarno daju maksimum da podrže i da prate sve aktivnosti nacionalnih manjina u gradu Tuzla. I to je dobro. I ja se nadam da će ta praksa ostati u narednom periodu i da će Javno preduzeće Radio televizija 7 i u narednom periodu pratiti aktivnosti koje rade udruženja nacionalnih manjina i da će javnost, odnosno građani grada Tuzle i šire biti upoznati sa aktivnostima.

Kad je u pitanju Pannonica, tu ne bi, kolega je Admir dosta govorio.

Nadalje, kad je u pitanju Javno komunalno preduzeće Saobraćaj i komunikacije Tuzla, normalno sve pohvale i ja ću se takođe pridružiti, kolega Anel je rekao, stvarno menadžment, direktor prvenstveno se odaziva na svaki poziv, ne samo vijećnika, nego i građana, savjeta mjesnih zajednica gdje se treba izvršiti određene aktivnosti, odnosno popravka da li ulične rasvjete ili za drugo što su nadležni. I dobro je što imamo, ovaj, povećan prihod i da su pozitivno poslovali. I to je dobro.

Vrlo je važno napomenuti da se čestito i pošteno radi u ovom Javnom komunalnom preduzeću. Evo ja ću iz svog ličnog iskustva, između ostalog, i ovaj višak prihoda od 38%, 150 maraka su od mene. Jedne prilike sam parkiro na nepropisno mjesto. Došo je „Pauk“ i odvuko mi auto i ja sam uredno platio 150 maraka, kao i svi drugi građani. I to je pošteno. I trebaju svi građani da budu ravnopravni, kako da imaju prava, tako i obaveze. I to je jednostavno pravo domaćinsko poslovanje pomenutog preduzeća i ja ću podržati takođe izvještaj od ovih svih javnih preduzeća. Hvala.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Zahvaljujem kolega Jusiću. Dajem riječ vijećnici Selmi Čatibušić, ispred Kluba Platforme za progres. Izvolite.

SELMA ČATIBUŠIĆ

Pa evo vođena diskusijom kolege Jusića, ja nisam platila kaznu, odnosno, nisam platila „Pauka“, nego mi je neki dan prvi put stavljena „kandža“ na vozilo. Mislim, bukvalno sam bila pet minuta i što je najcrnje, putem SMS-a sam platila, ovaj, parking, ali na druge tablice od službenog vozila, tako da, ovaj, ovim putem želim da pohvalim efikasnost, obzirom da sam bila, platila parking, bila odsutna pet minuta i već mi je „kandža“ bila zakačena i uslikana i sve to tako fino.

Tako da, ovaj, naravno moja je greška, ali hoću da kažem, ne podržavam „kandžu“. Zajedno sa kolegom Čavalićem dok je još bio u samom Vijeću smo je li diskutovali o tome, imali zajedničkih inicijativa, više puta doveli, došli do zaključka, odnosno, ne možemo mi doći do zaključka da je neustavno, nego jednostavno, ono, mislim, donesena je li presuda koja govori o tim stvarima. Nadam se da će „kandža“ uskoro da se ukine, ne samo zbog onako što, što tuđu imovinu totalno zakoči, nego i samim radnicima Saobraćaj i komunikacije je zaista nezgodno. Svaki put ljudi se, budimo realni, ovaj, namučte stavljajući to, noseći i slično.

Želim da svakako ovim putem pohvalim i ja, mada previše ga hvalimo, mogli bismo ga i ureć malo, direktora Nedžada Malikića koji je, ako ništa, na svaki poziv se odazvao. Svaki moj poziv prema njemu skontala sam da je bio nekako ujutru oko osam sati, tačno kad počne radno vrijeme, on je svaki put već bio, ovaj, na svom radnom mjestu. To isto tako mogu da pohvalim. Nekoliko intervencija sam lično prosljedila. Odmah su bile završene. Nadam se da ćemo evo svi zajedno, drago mi je što on podržava da se uvede besplatan parking za dobrovoljne davaoce krvi. Nadam se da će Gradsko vijeće imati volje da se izmijeni ta Odluka o javnim parkiralištima, pa da vidimo koji je najbolji način za to odraditi.

Svakako smo svjesni problema nedostatka parkinga u našem gradu i da se mora sistemski ići u, je li, realizaciju nekog rješenja koji će itekako imati smisla. Smatram da i za građane koji žive u stambenim objektima. Razumijem da ukoliko nisu nekoliko godina, ono, deset godina, dvadeset unazad plaćali parking, sad kada se parking naplati, ovaj, da je to već veliki namet, ali isto tako, ovaj, moramo bit svjesni jedne činjenice da je auto luksuz. Svugdje u svijetu se parkinzi, koliko god nama bilo il ne bilo drago naplaćuju, više sam za to da se i oko stambenih objekata ukoliko već ne postoji već, ovaj, neki parking koji je u okviru privatne zgrade kupljen, nego ukoliko se radi o javnim parkinzima, da se naplaćuju, tako će se uređivat, a građanima koji tu žive, svakako će biti puno dostupnije, obzirom da je godišnja cijena, čini mi se, ako se ne varam oko 90 maraka otprilike, što mislim zaista nije nešto skupo. Opet ponavljam, činjenica je da je auto luksuz, da svako domaćinstvo danas ima dva ili više auta i bila bi sretnija kad bi se išlo u tom nekom, ovaj, ka tom putu da se parkirališta oko zdravstvenih ustanova ne naplaćuju, al naravno na koji način bi to opet moglo, ovaj, da se je li vidi dal su u pitanju zaista pacijenti kojima je neophodno da su tu ili su nekako ljudi jednostavno došli iz neke okolne zgrade da se parkiraju i slično. Tako da, podrška. Glasat ću svakako za izvještaj Javnog komunalnog preduzeća Saobraćaj i komunikacije.

Što se tiče izvještaja javnog preduzeća Pannonica, ovaj put, ove godine barem mogu da pohvalim ono o čemu sam govorila u prethodnih nekoliko godina o nedostatku programa na jezerima, noćnog programa. Smatram da je ipak napravljen neki korak ka tome. Imaju sad ti neki koncerti i organizuju se. Inače, treba bit iskren, ja smatram da je ljeto u Tuzli ove godine, naravno tu su uključene neke privatne firme i Grad nešto organizuje, al smatram da stvarno ove godine ima ljepog sadržaja u gradu Tuzla. Barem što se tiče ljeta. Neko se žali koji su to pjevači u pitanju, dal su oni dobri, da li nisu, opet u skladu sa našim kapacitetima, razumijem da se ne mogu davat neke basoslovne cifre ni za neke pjevače koji zaista puno koštaju, ali opet smatram da je noćni život malo što se tiče ljeta u Tuzli živnuo. Možda sam ja i ostarila, pa je meni sad to sve, al, ovaj, mislim da je to malo bolje sada, tako da, to je toliko od mene. Hvala.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolegici Čatibušić.

Zatvaram raspravu klubova vijećnika.

Otvaram raspravu vijećnika.

Prva se za riječ se javila vijećnica Lejla Osmančević. Izvolite.

LEJLA OSMANČEVIĆ – samostalni vijećnik

Dobar dan. Pozdravljam sve prisutne. Biću jako kratka. Godinama tradicionalno komentarišem i diskutujem o izvještaju o radu i poslovanju Javnog preduzeća Pannonica. Onaj dio koji se mene tiče, a to je sigurnost i prva pomoć.

Iskoristit ću priliku da vas informišem da je u prethodnih desetak do petnaest dana, ovaj, bilo troje djece koja je ležala na Klinici za dječije bolesti zbog utopljavanja. Sva su djeca hvala Bogu na svu sreću dobro, ali hvala Bogu i na svu sreću dobrom organizacijom ove firme i ono što su oni obezbijedili već dugi niz godina, a to je sklapanje ugovora sa Službom hitne medicinske pomoći Doma zdravlja Tuzla da jedna dobra i kako oni kažu opremljena ekipa stručnih radnika bude u kontinuitetu od 10,00 do 19,00 sati, svaki dan kada je broj kupaca veći od 1000, ovaj, na tom mjestu.

Zahvaljajući dobroj intervenciji, jedno dijete je bukvalno imalo znači zastoj srca i disanja. Neću upotrijebit onaj izraz koji, ovaj, koji jeste bio takav. Zahvaljujući njihovom zlatnom standardu i dobroj reakciji, to dijete je, ovaj, hvala Bogu, dobro. Eto, znači, treba i o tome razmišljati.

U svakom slučaju hvala direktoru Doma zdravlja Tuzla. Znamo kakva je situacija sa kadrom. Nedostatkom i srednjeg i ljekarskog kadra. Ali oni uspijevaju u kontinuitetu održati ovu stvar i ja im se u tome zahvaljujem i naravno gledam u Elvira vezano za aparat za defibrilaciju, onu našu borbu dugogodišnju kao, kao vijećnika. Uspjeli smo i to je aparat za reanimaciju i defibrilaciju koji stoji i jeste na Pannonici. On u svakom slučaju puno znači. Spasit jedan život, to nema cijenu, ovaj, ni u kom slučaju. Eto. Zahvaljujem.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Hvala kolegici Lejli Osmančević. I zaista i ja izražavam veliko zadovoljstvo zbog toga. Sljedeći za riječ se javio vijećnik Mensur Alić. Neka se pripremi vijećnik Omer Berbić. Izvolite.

MENSUR ALIĆ

Zahvaljujem predsjedavajući. Evo ja ću bit veoma kratak. Kolega iz Tuzlanske alternative je govorio o svim preduzećima.

Ja ću se samo dotaći jednog dijela kad je u pitanju Saobraćaj i komunikacije, a to vraćam ideju i inicijativu prije dvanest godina sam pokrenuo zajedno sa Nedžadom Malikićem u Gradskom vijeću za garažu na UKC-u. Prije dvanest godina. Naravno, prije par godina je i SDP takođe samo potvrdio tu inicijativu i to je dobro kad više klubova traži tako nešto, onda na kraju dođemo do dobrog rezultata. Zajednički, kad su u pitanju veliki projekti. A ovo je jedan od strateških projekata. Znači, kad smo krenuli u tu inicijativu i pregovore sa UKC-om, BKC-om, UKC-om, u stvari. Miješam to. Tada se upravni odbor il nadzorni odbor i menadžment UKC-a su tražili da deset godina kad se izgradi, da deset godina samo koristi,

ovaj, Saobraćaj i komunikacije tu garažu, a da poslije toga predaje, preda to njima na upotrebu i njihova zarada. Ekonomska računica kad se pravila analiza je da čak za dvadeset godina treba da se vrate ti prihodi ukupna, kad je ukupna investicija, a nije se znalo tad ni kolika će investicija bit. Naravno, dolaskom novog direktora mi nismo stali. Mi smo dalje nastavili sa ovim radovima. I evo došli smo fala Bogu skoro do kraja. Zahvaljujući dugim razgovorima koji su išli u sasvim novom drugom pravcu gdje je ekonomska opravdanost daleko, daleko bolja, nego što je bila u prvim, u prvim godinama kad se razgovaralo o tome.

Evo danas mogu da kažem da je i urbanistička dozvola potpisana i da je direktor ja mislim otić popodne da je uzme i to je velika stvar, idemo sad na građevinsku dozvolu, ide onda građevinski projekat i sve ostalo. I ovo će biti četiri stotine parking mjesta. Ono što je važno rješava se i jedno od gorućih pitanja kad je u pitanju parking na UKC-u. I to sam htio da samo da se da napomenem kako za velikim projektima i inicijativama treba ići. Ne treba stat sa njima. Kad je podneseš onda mora se ići. Mora se dosta napora uradit da bi se dostiglo.

I čestitam, naravno, na upornosti direktora što je išao do kraja da se to radi. I biće to daleko, daleko bolja ekonomska računica, jer ovdje se ide ulaganje na osnovu korištenja parkinga koliko će mjesta, toliko će bit ulaganja. Kolko će ostat, ovaj, Saobraćaj i komunikacije, to je matematika koja govori da će to daleko bit isplativo. Ali ono što je najvažnije, tu rješavamo problem jedan. Vi svi znate i svi dolazite gore i svi mi idemo i znate da nema parkinga, nema se gdje parkirati. Evo fala Bogu to se rješava.

Drugo, samo htio bih da napomenem kad je u pitanju društvene mreže ovo o čemu je Ado govorio, evo pojavile se takođe na društvenim mrežama da je povećana cijena parking mjesta, što je ovaj...To je jedan vid propagande. Naravno, predizborna kampanja. I što je veoma ružno znate. Sve što valja što krene dobro u ovom gradu, treba to zaustaviti radi nekakvih glasova. To je populizam. Tako ga ja zovem, ali imaju i ti skriveni kako se zovu, botovi, pa to oni rade za određene političke stranke.

Cijenu parking mjesta donosi Gradsko vijeće. Mi nismo donijeli nikakvu promjenu cijena i nismo povećali ništa. To neka javnost zna da to Gradsko vijeće i kad dođe na Gradsko vijeće, mi ćemo razmislit hoćemo li povećat cijenu li nećemo. Evo, toliko. Zahvaljujem.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolega Mensur Alić. Riječ ima kolega Omer Berbić. Neka se pripremi vijećnica Merima Softić Sprečić.

OMER BERBIĆ

Hvala ljepo. Ja ću diskutovat oko sva tri izvještaja, jer sva tri izvještaja su jako interesantna. Ima dobrih, ima loših stvari, al ću najmanje vremena provest za Saobraćaj i komunikacije, jer sam ja mislim u zadnju godinu il dvije puno toga rekao, što se ne treba ponavljat i taj kontinuitet direktora da ima takav jedan otvoren odnos i da radi zaista vrhunski posao je stvar za pohvaliti.

Al, evo prvo ćemo oko RTV 7. Vidite da se može bit puno transparentniji i vidite da je bilo sve do direktora. Znači, dok nije došao novi direktor, odnosno dok nije došao novi gradonačelnik, sekunde mi nismo doveli na RTV 7. I svaki put sam ovdje tražio zaključak da se da koja sekunda opozicija na RTV 7. Sada kada je došao, opozicija ipak dobija neko vrijeme. Ono je možda simbolično, ali je to dokaz da barem simbolično se može napravit promjena u nekom demokratskom principu. I to je stvar zaista za pohvaliti. I tu niko ne može ništa reći. Zato svaka čast sa jednim novim otvorenim pristupom. Ja to cijenim, poštujem i mislim da je

vrijeme da se zahvalim. Evo, ovo je moj, ne znam, četvrti izvještaj o RTV 7. Prvi put da se zahvaljujem za nešto. I prvi put da ga pohvaljujem. U ovom smislu.

Imam jedno pitanje. Vidio sam da RTV 7 posjeduje stan na Slatini. Ko koristi taj stan? I ukoliko se ne koristi, dajte da taj stan da ide, da ga prebacimo na Grad Tuzla il na neki način da se iznajmi dugoročno Gradu Tuzla i da vidimo kako taj stan najbolje možemo iskoristiti. Ukoliko se to koristi, ko ima pravo na korištenje tog stana? U koje svrhe se taj stan koristi? Ako on donosi neki prihod RTV 7, to je ok. Ali, ukoliko je to pitanje nekih unutarnjih odnosa, unutar RTV 7 i korištenja, e to onda treba dobro preispitati.

Ja sam i u prošlom izvještaju tražio da se dostavi izvještaj o gledanosti, jer mi izdvajamo 845.000 maraka iz Gradskog vijeća, a ne znamo zašta izdvajamo. Znači, ukoliko izvještaj gledanosti, odnosno anketa koja pokazuje koliko je gledan RTV 7 bude pozitivna, bude bar na 3, 4, 5%, ja nemam nikakav problem. Ali, mi zaista puno izdvajamo novca u odnosu na ono što barem po mojoj nekoj percepciji, zato što nemamo objektivne standarde, a to je anketa jedini obje...anketa gledanosti jedini objektivan standard. Evo, ja pozivam RTV 7 da odradi anketu, da uzme Ipsos il neku drugu agenciju koja se time bavi, da plati i da se napravi jedna anketa gledanosti i da mi ovdje možemo pratiti koliko je gledan RTV 7, jer sav ovaj sadržaj koji se ovdje piše, je sadržaj na papiru. Al mi ako nemamo kvantitativne podatke, ako zaista nemamo cifre u rukama gdje mi kažemo ok, gledanost RTV 7 je porastao sa 3 na 6%, svaka čast, onda nema problema da mi izdvojimo još 20; 50.000 za neku novu opremu gdje ćete vi moć generisat novi sadržaj. Onda zaista nema smisla da mi na ovaj način radimo i da na ovaj način diskutujemo, jer ipak je to primarna funkcija da se pravi sadržaj, da ljudi gledaju sadržaj i onda taj milion ili 845.000 ili koliko god dajemo iz Budžeta, možda ima, možda ima neku opravdanost. U ovom trenutku ja ne vidim opravdano za toliko para.

Drugi zaključak. Gradsko vijeće traži, zahtjeva od menadžmenta RTV 7 da napravi mogućnost da se Gradsko vijeće prenosi uživo na RTV 7 ili na nekoj od internet platformi RTV 7. Vidjeli smo ovdje da ima youtube platforma i tako dalje. Znači, imaju tehničke mogućnosti. Samo je bitno da ima želje. Mislim da bi se Gradsko vijeće trebalo prenositi uživo kako bi ljudi mogli gledati u real time o čemu se ovdje diskutuje i o čemu se ovdje priča.

Prije jedno tri četiri mjeseca je na društvenim mrežama, odnosno ja sam dobio informaciju da ima javni tender za savjetnika direktora, koliko se sjećam RTV 7. I ja sam dobio neku informaciju da je taj javni tender za određenu osobu, koja je i politički aktivna, koja je tamo zaposlena za bivšu funkcionerku te kuće. Zanima me evo taj, dal će bit opet taj tender, dal je on samo sklonjen radi pritiska javnosti i ukoliko oće bit, koliko će bit financijska težina tog tendera, odnosno koliko je planirano da ta osoba zarađuje para na mjesečnom nivou, jer savjetnik direktora jedne medijske kuće, to je zaista smiješna funkcija i zaista se vidi da je ona iz političkih razloga izmišljena. Mislim da bi to na tome trebalo poradit, u to ne bi trebali ići, znači, ima direktor, ima menadžment. Menadžment ima da se bavi onim čime treba da se bavi. Ali zaista za savjetničke pozicije na ovim funkcijama nema...nema, nema nikakvog smisla.

Evo, ja ću još pola minute, da završim sa RTV 7, pa ću na drugo javljanje da pređem za Pannonicu.

Dalje. Vidjeli smo da je bio napad na hakera, hakera na određene stvari u RTV 7. Našta se konkretno ovo odnosi i kolika je šteta? Da li ima neke financijske štete? Da li ima neke štete u smislu da su ukradene određene stvari? I kako mi to možemo, dal menadžment ima ikakav plan da se ovo popravi, odnosno da se ovo više ne dešava?

I, zadnji zaključak: Gradsko vijeće traži od RTV 7 da razmisli o vraćanju imena RTV Tuzla. RTV 7 nema nikakvo simboličko značenje. RTV Tuzla ima simboličko značenje. Ako ne može RTV Tuzla, dajte nešto što ima veze sa Tuzlom. Sedmica na kraju RTV-a ja mislim da nema nikakve veze s Tuzlom. Da je RTV 75000 pa da ima nekog smisla. Al RTV 7, ja ne vidim simboličko značenje. Ako ima neko simboličko značenje, molim da mi se i to pismeno dostavi, koje simboličko značenje? Ljudi se ne mogu identifikovati sa RTV 7 kao gradskom

televizijom. Ljudi bi se mogli identifikovat sa RTV Tuzlom, jer je to istorijski tradicionalno bio jako bitan i najbitniji medij na ovom području. Hvala ljepo.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolegi Berbiću. Da li se još neko javlja ispred vijećnika?
Ja izvinjavam se. Merima Softić Sprečić. Izvolite.

MERIMA SOFTIĆ SPREČIĆ – vijećnik Socijaldemokratske partije

Pozdravljam sve prisutne, direktore pomenutih preduzeća. Ja ću kratko komentarisati, ovaj, za sva tri, pošto evo jako puno je bilo diskutantata i govorili ste o svim stvarima, ovaj, koje i treba spomenuti i promovisati.

Što se tiče Javnog preduzeća RTV 7, ja evo kao neko ko dolazi iz sporta želim da pohvalim sve ekipe, ljude koji su iza kamera, ljude koji za mikrofonima, naravno na čelu sa menadžmentom, što uspijete propratiti sve sportske manifestacije u gradu Tuzla, a za vrijeme ovog, ovaj, ljeta ih je bilo dosta i u narednom periodu će biti još više. Samo evo u narednom periodu želim da nastavite davati podršku svim sportistima pojedinačno proglašenim, kao i, ovaj, sportskim klubovima, sportskim manifestacijama kroz promocije u emisijama koje su prilagođene, naravno, ovaj, vašim gostima, jer pozitivne primjere zaista treba, ovaj, što više promovisati, kako bi oni bili određena motivacija naraštajima koji dolaze, koji žele da se bave sportom. Pohvaljujem naravno vaše poslovanje i glasat ću za.

Što se tiče javnog preduzeća Pannonica, to je naš biser koji, ovaj, svi trebamo na neki način promovisati i to i radimo. Ono što me raduje, raduje činjenica da zaista vidimo još veći broj, ovaj, prebivališta u gradu Tuzla za vrijeme ljetne sezone, zato što ljudi dolaze da, ovaj, se odmore na Panonska jezera. Sada mnoge porodice iz okruženja i ljetuju. Zaista ovom prilikom želim pohvaliti (ELVIR BIJEDIĆ – Molim malo tišine, molim vas). Želim pohvaliti, ovaj, menadžment preduzeća što imaju jako dobru kordinaciju sa Turističkom zajednicom Grada Tuzle koja, ovaj, evo na svim svojim sajmovima, na koje odlazi, a bilo ih je ne samo u zemlji, ovaj, u regionu, nego i šire, daleko, najčešće, znači, promoviše naš biser Panonska jezera i zasigurno je to jedan dobar način da u grad Tuzlu stigne što više ljudi sa strane, koji mogu, ovaj, da uživaju kako i u našoj gastronomiji, imamo se čim pohvaliti, ali, ovaj, i u Panonskim jezerima.

Što se tiče jednog prijedloga, možda nije za direktora, ali evo, ovaj, da uputim. Dobila sam onako od novosađana, moram priznati jednu, ovaj, da prenesem, jedan, jednu ideju, da, ovaj, „Tuzlanska koza“ koja možda nama je onako simbol stereotipa, ali za ljude koji dolaze, ovaj, u naš grad, oni se drže one jedne rečenice: „Cijela Tuzla jednu kozu muzla“ i žele da često dolaze ljudi da se slikaju pored te spomeničke kulture. Ja bih voljela, predložili su da ona bude u krugu Panonskih jezera kako bi im evo bilo bliže na neki način da se napravi i tu neka fotografija koja asocira, da su bili i ljetovali u gradu Tuzla, ovaj, nekad je nekima jednostavno teško možda po vrućini obići i doći do Hotela Tuzle. Možda imaju određene poteškoće u pronalaženju. Mislim da bi bila bolje i čuvana, ovaj, u tom, u krugu Panonskih jezera. Vjerujem da direktor, ovaj, da bi pristao je na to. Međutim, znam da nije to do direktora, nego do vjerovatno druge službe koja bi eventualno odlučila da možda izmjesti evo jedan, ovaj, tu spomeničku kulturu u krugu Panonskih jezera. Ne znam, ne znam kome bi išla inicijativa, ali evo neka bude zaključak prema službi. Omare, možeš mi pomoć.

Što se tiče preduzeća Saobraćaj i komunikacije, želim zaista pohvaliti vrijedni menadžment i slušala sam Selmu dok je pričala, ovaj, takođe isto, mislim, evo da svi imamo jako dobre pozitivna iskustva. Ja ću opet pohvaliti, ovaj, rasvjetu na sportskim igralištima i

terenima. Gdje god sam se obratila, ovaj, da to, a povodom našeg zaključka na Vijeću, jer smo rekli da na svim izgrađenim voljeli bi da, ovaj, budu rasvjeta što bolja, kako bi se tu i u evo ljetnom periodu u kasnijim, ovaj, satima okupljali roditelji sa manjom djecom, djeca, omladinci, nije važno i imali rekreativni sport. Zahvaljujem se zaista menadžmentu na realizaciji mnogih inicijativa, a postavljam samo pitanje, imala sam nekad inicijativu za kompresorske stanice, ovaj, u gradu Tuzla, obzirom da dolazi ljetni period, ovaj, vožnja bicikala je sve učestalija i to mi je drago. Voljela bih evo da vidim da li je nešto urađeno po toj inicijativi, obzirom evo da nam je došao period kada ljudi što češće koriste, ovaj, bicikla. U svakom slučaju, pohvaljujem sva tri preduzeća i daću svoju podršku. Hvala vam.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolegici Merimi Softić Sprečić. Kako nemamo prijavljenih, kolega Berbić može u drugom krugu. Izvolite.

OMER BERBIĆ

Hvala ljepo. Samo kratka ispravka za RTV 7. Nije tender za savjetnika direktora, nego konkurs čisto da se, ovaj...lapsus.

Idemo na Pannonicu. Znači, pitanje, pitanje konkretno oko Pannonice. Kiša je rastjerala sad narod gore jel. Zbog čega još uvijek poduzetnici, odnosno privatnici koji organizuju koncerte i tako dalje ne mogu da dobiju pristup Pannonici dok na primjer Bike fest i tako dalje neke organizacije mogu, što je jako pohvalno da mogu. Ali postavlja se pitanje zbog čega privatna lica ne mogu? Naravno, uz standarde da to bude muzika koja priliči gradskom, gradskoj urbanoj sredini i u standardu da tu ne bude stakla i tako dalje koje bi kasnije moglo da, da pravi haos i naravno sve ostale sigurnosne standarde.

Znači, mislim da bi se Pannonica trebala otvoriti privatnicima nakon radnog vremena, gdje bi oni mogli da organizuju razne koncerte. Pannonica je zaista jedno moram reći u pogotov u večernjim satima romantično mjesto. Mislim da bi bilo izuzetno bolje iskorišteno ukoliko mi napravimo saradnju privatnog kapitala i javne ustanove. Mislim da bi to zaista moglo biti jako ljepo, jako ljepo za grad Tuzlu.

A, zbog čega je, idem, idem dalje, znači, gledajući plate nekako, vidio sam da je naj niža isplaćena plata iz prošle godine, odnosno na 23-u, mislim da je sa 22-u na 23-u, naj niža isplaćena za 82 marke, a naj viša je za 200 maraka. Mislim da bi to trebalo malo obrnuto da se radi. Ipak, ljudi sa 600 maraka ne bi mogli da žive. I sa 700 maraka mislim da nije realno da neko može da preživi na ovom vremenu. Mislim da bi ovaj način trebalo malo napraviti korekcije određene da se naj više plate možda dignu za, za, za 100 maraka, a naj niže za 100, za 160. Mislim da je to možda malo prihvatljivije u ovom, u ovom, u ovom smislu.

A, dalje, da li ima ikakav plan za ono pokriveno jezero koje je bilo najavljeno prije 7, 8, 10 godina? Šta se dešava tu? Da li postoji ikakva aktivnost? Da li ima neka mogućnost i tu da se sa privatnicima napravi neka vrsta saradnje? Mislim da mi smo na neki način postali 3D grad, render grad, da se sve ono što je obećano u 3D-u ispunilo, mi bi sad bili Ženeva. Ali, zaista ne treba se zaboravljati na dobre projekte koji su pa evo pretočeni, pretočeni građanima pred izbore u 3D-u. Mislim da na tim projektima treba insistirati, da na tim projektima treba dalje raditi. Između ostalih i to pokriveno i nadkriveno jezero, Panonskih jeze...Nadkriveno jezero je bilo jedan od tih projekata. Zanima me šta se, šta se s tim dešava?

Hoću da pohvalim opet transparentnost ovog izvještaja. Zaista jedini jako, jako transparentan izvještaj, čak dotle da je još uvijek stoji da je politička partija jedna koja ovdje sjedi, dužna 1.600, 1.700 maraka, gradski odbor određene političke partije i da je to napravljeno

u izvještaju kao potraživanja od dobavljača. Mislim da je to dobro, jer to politička partija koja je postavila direktora, ipak je ta vrsta transparentnosti nešto što gradu Tuzla treba, a ne da se ovakve stvari stavljaju pod tepih, da se sakrivaju i tu moram, moram pohvaliti ovakvu jednu vrstu transparentnosti, ali ipak mislim da je možda vrijeme da se malo to angažovanije radi u smislu rada sa poduzetnicima. Mislim da su Panonska jezera jedan jako neiskorišteni potencijal još uvijek. I Turistička zajednica je sad tamo počela da organizuje koncerte. Ako Turistička zajednica može, onda bi svi trebali da imaju mogućnost da mogu. Naravno, u skladu sa nekim gradskim principima da to bude muzika koja ima smisla, a ne da to bude muzika koja je prilagođena manje urbanim sredinama, tako da se izrazim.

I ovo tražim kao zaključak da menadžment Javnog preduzeća Pannonica napravi mogućnosti javno privatno partnerstvo u smislu u smislu organizovanja koncer...koncerta (ELVIR BIJEDIĆ – Koncerata). Koncerata. U smislu organizovanja koncerata, naravno poštujući principe za koje se Grad Tuzla zalaže i sve sigurnosne standarde.

I oću za kraj još dva zaključka da predložim konkretno za Javno preduzeće Saobraćaj i komunikacije. Jedan od zaključaka je kolega Ibeljić spomenuo. Mi smo se ovdje za to borili jako u zadnje tri godine. Pisali smo i neke apelacije i tako dalje. A to je ova „kandža“ koja se postavlja. I meni se konkretno uvijek, znači, sigurno mi se jednom sedmično javljaju ljudi. Mislim da „kandža“ nije dobar način. Treba naći načine.

Zaključak je evo da Javno preduzeće sjedne sa Gradom Tuzla i da se riješi pitanje naplate kazni u... za one koji nisu platili parking, umjesto da se stavlja „kandža“. „Kandža“ je nelegalna. „Kandža“ je stvar koja blokira tuđu imovinu, a Javno preduzeće ne bi trebalo da ima pravo da blokira javnu, odnosno tuđu imovinu. Pogotovo tu imovinu koja je vrijedna desetine hiljada maraka radi kazne od tri, četiri marke i tako dalje.

I zadnji zaključak oko Javnog komunalnog preduzeća Saobraćaj i komunikacije. Mislim da je bitno da se definiše 15 minuta, da građani mogu imati besplatan parking. To bi se definisalo kao i u svim svjetskim metropolama. Znači, imate plastični sat. Kada građanin izađe iz auta i namjesti sat tačno na vrijeme kada je izašao. Ukoliko prođe 15 minuta od tog vremena, onda se stavlja kazna il na neki drugi način se osigurava da građanin plati tu cijenu od 15 maraka.

Znači, zaključak je da menadžment Javnog komunalnog preduzeća Saobraćaj i komunikacije razmisli kako da napravi mogućnost da se 15 minuta oslobode građani parkinga.

I evo za kraj. Samo me zanima da li postoji ikakva mogućnost da se građani koji daruju krv, da dobiju godišnju kartu? To je inicijativa, čija? Selmina jel? Čija je? (ESANA KAVAZBAŠIĆ HUSKANOVIC – Selmina). Selmina inicijativa. I ja sam tu davao kao inicijativu na istoj sjednici, ali evo da ne bude da nisam spomenuo. Hvala ljepo. Toliko.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Hvala kolega Berbiću.

Zaključujem raspravu vijećnika.

Dajem pauzu od deset minuta, kako bi se formulisali zaključci. Dakle, vidimo se u 12 i 30. Molim vas. Hvala.

(Pauza).

Molim vijećnice i vijećnike da uđu u salu kako bi nastavili sa sjednicom. Hvala.

Nastavljamo sa sjednicom.

Dakle, ja bih, ja bi predložio da ako ste, naravno, ukoliko nemate ništa protiv da za sva tri preduzeća glasamo u paketu. Jel može? (Odvojeno). Dobro. Ukoliko nemamo konsenzus idemo odvojeno. Odvojeno.

Sada stavljam na izjašnjavanje izvještaj o radu i poslovanju Javnog preduzeća RTV 7 d.o.o. Tuzla za 2023. godinu i pozivam vijećnike da se izjasne.

Glasanje je okončano.

(ESANA KAVAZBAŠIĆ HUSKANović – Nisam ja glasala). Pa, molim vas Esana. Zašto moram reći da je završeno da biste vi glasali. Molim vas da ponovite.

Glasanje je okončano.

Konstatujem da je izvještaj o radu i poslovanju Javnog preduzeća RTV 7 d.o.o. Tuzla usvojen sa, dvadeset...(MERIMA SOFTIĆ SPREČIĆ – Nije Omer glasao. Izvinjavam se predsjedavajući). Hvala kolegice Merima.

Molim vas da poništite glasanje. Ja vas molim za koncentraciju da glasamo. Molim vas.

Glasanje je okončano.

Konstatujem da je izvještaj o radu i poslovanju Javnog preduzeća RTV 7 d.o.o. Tuzla usvojen sa,

24 glasa za, nije bilo protiv i 2 suzdržana.

Sada stavljam na izjašnjavanje izvještaj o radu i poslovanju Javnog preduzeća Pannonica d.o.o. Tuzla za 2023. godinu i molim vas da se izjasnite.

Glasanje je okončano.

Konstatujem da je izvještaj o radu i poslovanju Javnog preduzeća Pannonica d.o.o. Tuzla za 2023. godinu usvojen sa,

26 glasova za, nije bilo protiv i nije bilo suzdržanih.

Prelazimo na glasanje za izvještaj o radu i poslovanju Javnog komunalnog preduzeća Saobraćaj i komunikacije Tuzla za 2023. godinu, te vas molim da se izjasnite.

Glasanje je okončano.

Konstatujem da je izvještaj o radu i poslovanju Javnog komunalnog preduzeća Saobraćaj i komunikacije Tuzla za 2023. godinu usvojen sa,

27 glasova za, nije bilo protiv i nije bilo suzdržanih.

Sada pozivam sekretara Gradskog vijeća da pročita zaključke koji su proizašli iz diskusija.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od Javnog komunalnog preduzeća Saobraćaj i komunikacije da, u saradnji sa Službom za komunalne poslove, izgradnju i poslove mjesnih zajednica, u razumnom roku pripremi izmjene Odluke o javnim parkiralištima na području grada Tuzla, na način da se navedenim izmjenama ukine fizičko blokiranje vozila postavljanjem uređaja za blokiranje tzv. „kandži“.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite po pročitanoj zaključku.

Glasanje je okončano.

Konstatujem da je pročitani zaključak dobio potrebnu većinu sa, 25 glasova za, nije bilo protiv, sa 1 suzdržanim glasom.

Prelazimo na sljedeći zaključak.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od Javnog komunalnog preduzeća Saobraćaj i komunikacije da u kontinuitetu nastavi sa aktivnostima koje se odnose na izgradnju javnih parking garaža, kao i na povećanje ukupnog broja parking mjesta na području grada Tuzla.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Glasanje je okončano.

Konstatujem da je pročitani zaključak dobio potrebnu većinu sa, 25 glasova za, nije bilo protiv i sa 1 suzdržanim glasom.

Molim za sljedeći zaključak.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od menadžmenta Javnog preduzeća RTV 7 da uradi izvještaj, odnosno anketu o gledanosti programa RTV 7.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Glasanje je okončano.

Konstatujem da pročitani zaključak nije dobio potrebnu većinu, za je bilo 4, 2 bila protiv i 20 suzdržanih vijećnika.

Molim sekretara Gradskog vijeća za sljedeći zaključak.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od menadžmenta Javnog preduzeća RTV 7 da napravi tehničke mogućnosti da se sjednica Gradskog vijeća Tuzla uživo prenosi u program RTV 7 ili na nekoj od internet platformi koji koristi RTV 7.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Glasanje je okončano.

Konstatujem da pročitani zaključak nije dobio potrebnu većinu, 11 je bilo za, 1 je bio protiv i 15 glasova suzdržanih.

Imamo li još zaključaka? (OMAR AHMIĆ – Ima, imamo još tri). Izvolite.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

-Gradsko vijeće Tuzla traži od menadžmenta Javnog preduzeća RTV 7 da još jednom razmotri mogućnost da se izvrši promjena naziva RTV 7 u RTV Tuzla.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Glasanje je okončano.

Konstatujem da je pročitani zaključak dobio potrebnu većinu sa, 25 glasova za, 1 bio protiv i 1 suzdržani.

Molim da pročitate sljedeći zaključak.

Molim vas za tišinu.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od menadžmenta Javnog preduzeća „Pannonica“ d.o.o. Tuzla da u saradnji sa nadležnim službama razmotri mogućnost da se spomenik „Tuzlanskoj kozi“ sa sadašnje lokacije izmjesti u kompleks Javnog preduzeća „Pannonica“ d.o.o.Tuzla.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Molim vas, ne možemo mijenjati. Ovo je zaključak bio, ne mogu...

Glasanje je okončano.

Konstatujem da je pročitani zaključak dobio potrebnu većinu sa, 24 glasa za, 1 je bio protiv, 2 suzdržana.

Molim za sljedeći.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od Javnog komunalnog preduzeća Saobraćaj i komunikacije Tuzla da razmotri mogućnost uvođenja besplatnog parkinga za prvih 15 minuta korištenja.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Jel treba ponoviti?

Ja vas molim da ponovimo glasanje.

Molim vas da se izjasnite.

Glasanje je okončano.

Konstatujem da pročitani zaključak nije dobio potrebnu većinu, 8 je bilo za, 1 protiv i 18 suzdržanih.

S obzirom da smo iscrpili zaključke prelazimo na...Izvinjavam se. (vijećnik Omer Berbić govori bez uključenog mikrofona op.a.). Ok.

Molim samo sekretara da formuliše da nam pročita zaključak.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

- Gradsko vijeće Tuzla traži od Javnog preduzeća Pannonica d.o.o. Tuzla da razmotri mogućnost da putem javnog privatnog partnerstva vrši organizaciju koncerata na kompleksu Pannonice, poštujući principe, znači, za koji se Grad Tuzla zalaže i sigurnosne protokole.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Molim vas da se izjasnite.

Glasanje je okončano.

Konstatujem da pročitani zaključak nije dobio potrebnu većinu,

15 je bilo za, 1 je suzdržan i 11 je...Izvinjavam se, 1 je protiv i 11 suzdržanih.

Zahvaljujem se.

Idemo dalje.

Prelazimo na sljedeću tačku dnevnog reda.

Tačka osam:

RAZMATRANJE I USVAJANJE IZVJEŠTAJA O RADU JAVNIH USTANOVA ČIJI JE OSNIVAČ ILI SUOSNIVAČ GRAD TUZLA ZA 2023. GODINU

a) JU Centar za socijalni rad Tuzla

Predlagač: upravni odbor ustanove

Obrađivač: direktor ustanove

Materijal su razmatrali...Molim vas za malo pažnje. Materijal su razmatrali: Komisija za ekonomske odnose, Komisija za poduzetništvo i klubovi vijećnika.

Da li ima potrebe za uvodnim izlaganjem? (Nema).

Da li ima potrebe da se pročitaju izvještaji komisija? (Nema).

Otvaram raspravu klubova vijećnika.

Poslovnička. Mensur Alić. Izvolite.

MENSUR ALIĆ

Predlažem isti zaključak, ovaj, kao i na prethodnom kad su bila javna preduzeća, da se pismeno odgovori na postavljena pitanja.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolegi Aliću.
Molim da se izjasnimo po prijedlogu kolege Alića.
Ko je za?
Glasanje je okončano.
Konstatujem da je prijedlog vijećnika Alića usvojen sa,
24 glasa za, nije bilo protiv, sa 1 suzdržanim glasom.

Dakle, otvaram raspravu klubova vijećnika.
Zatvaram raspravu klubova vijećnika.
Otvaram raspravu vijećnika.
Izvolite. Kolega Mensur Alić.

MENSUR ALIĆ

Ja ću predložiti samo jedan zaključak.
Do prije četiri godine na Gradskom vijeću Tuzla donijeli jedan zaključak da, pošto puno fali stručnih kadrova kad je u pitanju ova javna ustanova, a pošto to fali negdje oko do 12 do 15, pa smo donijeli tad zaključak da svake godine se primaju po dva kako bi olakšali prijem, a da, ovaj, (ELVIR BIJEDIĆ – Molim vas za malo pažnje), a da se ti radnici, ovaj, prime, a to su socijalni i psiholozi. Da jedan zaključak da bude da u narednim, svake godine idemo po prijem dva, dva radnika u ovu ustanovu. Najmanje dva. Al da zaključak bude...Molim? (OMAR AHMIĆ – Socijalni radnici i psiholozi?). Za socijalni rad i psiholozi. Pa može jedno, jedno. Zavisno šta im treba. Oni će svake godine iskazati. Al da bi dostigli to u narednih pet godina, da popunimo ta radna mjesta, koja su veoma bitna i potrebna.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolega Aliću. Kolega Mehmedinović. Izvolite. Mensure, mogu li vas zamoliti za mikrofon. (MENSUR ALIĆ – Može). Hvala.

SENAD MEHMEDINOVIĆ

Ma ništa. Evo i ja da se samo nadovežem što je gospodin Mensur predložio zaključak. Mi smo na proteklim sjednicama govorili o Centru za socijalni rad i u njihovoj nadležnosti između ostalog jeste bavljenje osobama koji imaju određene probleme, nepoželjne oblike ponašanja. I mi smo dva puta donijeli zaključak da se u Pravilniku o unutrašnjoj sistematizaciji radnih mjesta planira zapošljavanje stručnih saradnika - socijalnih pedagoga koji bi se bavili ovom problematikom, obzirom da je učestalost nepoželjnih oblika ponašanja u populaciji na nivou grada Tuzle i Tuzlanskog kantona sve više povećana.

Ja sam dobio informaciju i odgovore da i zahvaljujem se na tome da je Centar za socijalni rad krenuo sa inicijativom za izmjenom standarda, tako da Pravilnik o unutrašnjoj sistematizaciji prepoznaje zanimanje socijalni pedagog, odnosno, edukator-rehabilitator i tim povodom želim čestitati. Možda ne bi bilo loše ukoliko se evo i Mensur slaže, obzirom da je to nadležnosti Centra za socijalni rad, dakle, jesu socijalni radnici, jesu psiholozi i obzirom da imamo populaciju djece koja imaju nepoželjne oblike ponašanja, da to u budućnosti bude

praksa stručnjacima ovog profila. To je socijalnim pedagozima i edukatorima-rehabilitatorima u ovisnosti od potrebe situacije i tako dalje. Hvala najljepša.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Ok. Formulirat ćemo takav zaključak u, evo...Kolega Alić nema ništa protiv, pa ćemo to Omare dopunit.

Sljedeća za riječ se javila vijećnica Selma Ćatibušić. Izvolite.

SELMA ĆATIBUŠIĆ

Obzirom da su zaposleni iz Centra za socijalni rad članovi Mobilnog tima za borbu protiv prosjačenja i trgovine ljudima, predlažem zaključak da se minimalno jednom godišnje organizuje, zapravo da predstavnik Centra za socijalni rad koji je ujedno član Mobilnog tima da izvještaj o stopi prosjačenja u našem gradu, odnosno u borbi protiv trgovine ljudima, da nas izvjesti o tome koliko je bilo slučajeva koji su prijavljeni, koliko je bilo roditelja koji su povratnici koji svoju djecu vraćaju na ulice, iako su više puta bili sankcionisani ili upozoreni? Tako da eto voljela bih da imamo i takav jedan izvještaj da bismo i svi ostali vijećnici bili upućeni kako traje ta borba na našim, na našim ulicama. Borba za zaštitu prava djeteta koja treba da budu u školama, a ne na ulici.

Drugi zaključak, odnosno dat ću jedan kratak uvod Zakon o prebivalištu i boravištu građana Bosne i Hercegovine je svakako zakon koji opet iziskuje određene promjene koje su neophodne i predstavlja prepreku za mnoge stvari, odnosno za ostvarivanje mnogih prava, osnovnih ljudskih prava naših građana i građanki.

U jednom članu, čini mi se da je član 7. ovog Zakona govori se o tome da nadležni Centar za socijalni rad može ukoliko osoba je beskućnik, ukoliko trenutno nema adresu prebivališta, odnosno nigdje se ne vodi, može da prijavi njenu adresu na adresu Centra za socijalni rad. Ali, mi ćemo je li kao Udruženje u kojem radim ići u izmjenama, u proces izmjene i dopune tog Zakona.

Ali ovim pri...ovom prilikom bih predložila eto jedan zaključak, da će Centar za socijalni rad sam prihvatiti to da prijavljuje osobe koje nemaju trenutno adresu prebivališta, ono što se kaže sam od sebe. Apsolutno nema nikakve prepreke da nadležni Centar za socijalni rad svaki takav jedan slučaj prijavi na svoju adresu. Da postoji određena procedura koja se odnosi na to da se te osobe moraju redovito javljati i slično. Al smatram da je, ukoliko želimo da idemo u taj neki proces je li ostvarivanja osnovnih ljudskih prava poput zdravstvene zaštite, postoje neka djeca koja zbog ovih, ove situacije s roditeljima nisu upisana ni u matične knjige i slično. Veliki su problemi oko toga. Ovo je Zakon koji je na državnom nivou. Ali evo jedan zaključak koji bi išao sa lokalnog nivoa, svakako bi, ovaj, mogao predstavljati jednu dobru praksu.

Ono što znam jeste da u Zenici konkretno, npr. postoji Udruženje koje prijavljuje, koje je ostavilo svoju adresu da, da se osobe u takvom, u takvom...u takvom stanju mogu prijaviti na njihovu adresu, pa smatram da jedna naša institucija isto to može uraditi. Smatram da bi se ovim načinom je li smanjile te fiktivne adrese koje su vrlo česte nažalost gdje ljudi traže novac da prijave nekog drugog na svoju adresu, čisto da bi ta neka osoba imala, ostvarila određeno pravo.

Tako da eto, mislim da zaključak u principu, svjesni smo koliko ima efekta, ali ako ništa, pokrenut će tu priču, pa možda i Gradsko vijeće, odnosno Grad Tuzla da neku inicijativu sa lokalnog nivoa prema višim nivoima da se ide u izmjene i dopune ovog Zakona, u ovom dijelu koji je zaista diskutabilan. Eto. Hvala.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Zahvaljujem kolegici Selmi Ćatibušić.

Zaključujem raspravu vijećnika i stavljam na izjašnjanje Izvještaj o radu Javne ustanove Centar za socijalni rad Tuzla za 2023. godinu i molim vijećnike da se izjasne.

Glasanje je okončano.

Konstatujem da je Izvještaj o radu Javne ustanove Centar za socijalni rad Tuzla za 2023. godinu usvojen sa, 24 glasa za, nije bilo protiv i sa 1 suzdržanim glasom.

Izvinjavam se. Kolega Husić. Greška jel? Ok. Zamolit ću vas da ponovimo glasanje. Izvolite.

Glasanje je okončano.

Ajde molim vas Merima.

Moramo ponovo.

Molim vijećnike za koncentraciju.

Glasanje je okončano.

Konstatujem da je Izvještaj o radu Javne ustanove Centar za socijalni rad Tuzla za 2023. godinu usvojen sa,

26 glasova za, nije bilo protiv i nije bilo suzdržanih.

Molim sekretara Gradskog vijeća da pročita zaključke koji su proizašli iz diskusije.

I naravno...Izvinjavam se samo Omare. Dakle, ovaj, izjašnjavat ćemo se opet zaključak po zaključak. Hvala.

Izvinjavam se samo, ostanite na svojim mjestima, samo zbog formulacije zaključka. Samo pauza par minuta. Par minuta. Hvala.

(Pauza).

Nastavljamo sa sjednicom.

Zamoliću, zamoliću, molim vas za malo pažnje.

Nastavljamo sa sjednicom.

Zamoliću sekretara Gradskog vijeća da nam pročita zaključke kako ćemo se izjaš...Dakle, jedan...Izjašnjavamo se zaključak po zaključak. Hvala.

**OMAR AHMIĆ – Stručni savjetnik za normativno-pravne poslove i
opsluživanje komisija Gradskog vijeća Tuzla**

- Gradsko vijeće Tuzla traži od Javne ustanove Centar za socijalni rad da u skladu sa radnijim zaključcima Gradskog vijeća i u narednom periodu nastavi vršiti zapošljavanje neophodnog stručnog kadra, odnosno socijalnih radnika, pedagoga-psihologa, te socijalnih pedagoga i edukatora-rehabilitatora.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Molim vas da se izjasnite.

MENSUR ALIĆ

Malo mi je nejasno samo, ovaj...

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Izvinjavam se. Recite.

MENSUR ALIĆ

Nejasno mi je da, da...jel, to je trebal ić u drugačijem zaključku. Ne primaju oni. Nego oni trebaju dobit odobrenje od Gradske uprave, od službe koja vodi. Ako ovakav zaključak, onda ništa nismo uradili. (ZORAN JOVANOVIĆ – Uslovi da se obezbijede). Da se obezbijede uslovi. (NATAŠA PERIĆ – Pa dodatje).

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Omare, molim vas samo dodajte.

**OMAR AHMIĆ – Stručni savjetnik za normativno-pravne poslove i
opsluživanje komisija Gradskog vijeća Tuzla**

- Gradsko vijeće Tuzla traži da se obezbijede uslovi kako bi Centar za socijalni rad u narednom periodu mogao vršiti zapošljavanje ovih osoba.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Ok. Molim vas da se izjasnite.

Glasanje je okončano.

Konstatujem da je pročitani zaključak dobio potrebnu većinu sa, 26 glasova za, nije bilo protiv i nije bilo suzdržanih.

Molim vas za sljedeći zaključak.

**OMAR AHMIĆ – Stručni savjetnik za normativno-pravne poslove i
opsluživanje komisija Gradskog vijeća Tuzla**

- Gradsko vijeće Tuzla traži da se jednom godišnje uposlenik Javne ustanove Centar za socijalni rad, koji je ujedno i član Mobilnog tima za borbu protiv prosjačenja i trgovinu ljudima, usmeno podnese izvještaj Gradskom vijeću Tuzla o stopi prosjačenja i trgovine ljudima na području Grada Tuzla.

**ELVIR BIJEDIĆ - zamjenik predsjedavajućeg Gradskog vijeća Tuzla,
-vijećnik Socijaldemokratske partije**

Molim vas da se izjasnite.

Glasanje je okončano.

Konstatujem da je pročitani zaključak dobio potrebnu većinu sa, 25 glasova za, nije bilo protiv i 1 suzdržan.

Molim vas za sljedeći.

OMAR AHMIĆ – Stručni savjetnik za normativno-pravne poslove i opsluživanje komisija Gradskog vijeća Tuzla

Pa, sljedeći je znači zaključak koji je Selma (ELVIR BIJEDIĆ – Povukla je) će povući.

ELVIR BIJEDIĆ - zamjenik predsjedavajućeg Gradskog vijeća Tuzla, -vijećnik Socijaldemokratske partije

Ok. Konstatujem da je Selma Čatibušić povukla zaključak. Idemo dalje. (OMAR AHMIĆ – To je to. To je to). To je to. Ok. Završena je osma tačka dnevnog reda.

Tačka devet:

RAZMATRANJE IZVJEŠTAJA KOMISIJE ZA IZBOR I IMENOVANJA

Sekretar? (OMAR AHMIĆ – Nije bio znači...). Nije bilo, nije bilo ništa kad je u pitanju Komisija za izbor i imenovanja.

Tačka deset:

TEKUĆA PITANJA

a) Obavještenje „Tržnice-Pijace” d.o.o. Tuzla o razlozima prolongiranja izrade Izvještaja o radu i poslovanju za 2023. godinu

b) Obavještenje JP BIT Centar d.o.o. Tuzla o razlozima prolongiranja izrade Izvještaja o radu i poslovanju za 2023. godinu

c) Obavještenje JKP „Komunalac“ d.o.o. Tuzla o razlozima prolongiranja izrade Izvještaja o radu i poslovanju za 2023. godinu

Konstatujemo, dakle, da smo primili k znanju sva ova obavještenja i ja zaključujem 40. redovnu sjednicu Gradskog vijeća Tuzla.

Zahvaljujem se vijećnicima, predlagачima i obrađivačima materijala. Hvala.

(S obzirom da je Dnevni red iscrpljen i 40. redovna sjednica Gradskog vijeća Tuzla zaključena ista je završena u 13:00 sati.)

STENOGRAM SAČINILA:

Selma Šehić

P R E D S J E D A V A J U Ć I

Nataša Perić, prof. s.r.